



静脩先生文集卷之四

容城劉因夢言甫著

七言古詩類

桃源行

六王掃地阿房起桃源與秦分一水小國寡民君所



憐賦役多慙負天子天家正朔不得知手種桃枝辨
四時遺風百世尚不泯俗無君長人熙熙漁舟載入
人間世却悔桃花露踪跡曾聞父老說秦強不信而
今解亡國画图曾識武陵溪飛鴻滅沒天之西但恨
於今天千載不聞再有漁人迷

明妃曲

初聞丹青寫明眸明妃私喜六宮羞再聞北使選絕
色六宮無慮明妃愁妾身只有愁可必萬里今從漢
宮出悔不別君未識時免使君心憐玉質君心有憂
在遠方但恨妾身是女郎飛鴻不解琵琶語祇帶離
愁歸故鄉故鄉休嗟妾薄命此身雖死君恩重來時
無數後宮花明日飄零成底用宮花無用妾如何傳
去哀絃幽思多君王一要聽新聲譜為譜高皇猛士歌

塞翁行

塞翁少小壘上鋤塞翁老來能捕魚宋家昔日塞翁

行屯田校尉功不如西山瀛海接千里長城又見開
長渠要將一水限南北笑殺當年劉六符天教破澤
養鴈驚留與金人賦子虛我來鄉國覽風土髣髴
鼓笛嗚嗚曾中雲夢忽已失酒酣懷古皆平蕪昔年
阻水群盜居塞翁子孫殺欲無至今遺老向人泣前
宋監邊無遠圖

武當野老歌

南陽武當天下稀峯巒巧避山自迷青天飛鳥不可
度但見萬壑空烟霏山不知人從太古白雲飛來天
佐主旌旗明滅漢陽津幾閱東西互夷虜老人住此

今百年自言三世絕人烟往事不聞宣政後初心歆
返羲皇前脯鹿為糧豹為席竹樹蒼蒼歲寒國天分
地拆保無憂怪見北風山鬼泣一聲白鴈已成擒回
望丹梯淚滿襟傳語桃源休避世武陵不似武當溪
感秋思古人之
不可見也
湘絃悠悠阻清音駕車欲往洛水溪白榆一葉驚河
漢萬里碧霄中夜心玉鸞翩翩紛翠羽髣髴機絲隔
烟霧瓊枝難得芳華年惟恐流光兩遲暮河傍有星
名牽牛此星既出令人愁明朝再見明河影已隔人
間萬古秋

飲後

日光射雨明珠璣怒氣鬱作垂天蜺天漿海波吸已
竭倒景徑入黃金卮金卮一傾天宇閑天公愁吐膏
中竒海風掀舉催月出吹落酒面浮明輝瓊芝瑞露
千萬斛肝腸瀟瀟欲飢金宮銀闕此何處夜半夢
落崑崙西眼中之人素所期赤霜為袍丹霞衣明星
煌煌何太速碧霄悵望白雲低

西山

西山龍蟠幾千里力盡西風吹不起夜來赤腳踏蒼
鱗一著神鞭上箕尾天風冷冷清入肌醉抱明月人

問歸嫦娥灑淚不敢語
銀河鼓浪需人衣寄謝君平
莫饒舌袖中此物無人知

登荆軻山

兩山巖巉補天色中有萬斛江聲
哀人言此地荆軻館尚餘
癸壘山之隈太子西來函關開
誰信生兒為禍胎筆頭斷取江山去
已覺全燕如死灰馬遷尚俠非史才
淵明憤世傷幽懷春秋盜例久不舉
紫陽老筆生風雷遺臺古樹空崔嵬
平蕪落日寒烟堆紛紛此世亦良苦
今古燕秦經幾回憂來徑欲浮蓬萊
安詩魯連同一杯碣石東頭喚羨門
六鰲載我三山來

薛稷雙鶴

胎禽寥廓非人境只許清江見
寒影書家筆頭垂露姿一變凌雲
更脩整前鶴忘機如易馴後鶴昂
藏不可羣二鶴相看如有語松下
盤石少此人

幼安濯足圖

漢家無復雲臺功平生不識大耳公
眼中天意鏡中語此身只有扁舟東
關東諸公亦英雄百年能辨山陽封
歸來老栢號秋風世事悠悠七十翁
乾坤故物兩足在霜海浮雲空復空
無刀可斷華太尉有死不為丕大中
丹青白帽凜冰雪高山目送冥飛鴻
為問

蘇家好兄弟萬古北海誰真龍

長公愛文舉次公受
幼安蓋氣質各以類

云

采菊圖

天門折翼不再舉袖手四海橫流前長星飲汝一盃
酒留我萬古羲皇天廟堂衮衮宋元勳爭信東籬有
晉臣南山果識悠然處不惜寒香持贈君

歸去來圖

淵明豪氣昔未除翱翔八表凌天衢歸來荒徑手自
鋤草中恐生劉寄奴中年欲與夷皓俱晚節樂地歸
唐虞平生磊磊一物無停雲懷人早所圖有酒今與

龐通沾眼中之人不可呼哀歌撫卷聲嗚嗚

雪翠軒

西山萬古青未了黛綠鬟雲已傾倒豈知太虛忽生
白恍如厚夜今復曉紫陽仙翁見本根白波開天餘
浩渺胷中盤曲此高寒曾夢肝腸倚天表蒼崖飛來
天出巧為護烟嵐翠如掃萬縷寒烟吹不舉靜秀依
依見娟好此時先生一開軒平生壁立金玉削脚底
游塵軟更紅黑頭擾擾誰為雄臨風回首三太息安
得置此冰壺中西山秀色千萬里一顧可洗浮雲空
遙望飛泉駕遠壑中有一路開雙松人間風日不到

書仙傳卷之四
五
慶來訪軒中雪翠翁

山中

山中望塔倚天表今得金山如立草不知天地視全
山何如一粒江湖渺平生老眼如層梯昨日所為今
鬼嬉神功天巧祇如此人力區區能幾爾世間壯觀
徒紛紛堯舜事業猶浮雲

飲山亭雨後

山如翠浪經雨漲開軒宛坐扁舟上西風為我吹拍
天要駕雲帆恣吾往太行一千年一青才遇先生醉
眼醒却笑劉伶糟麴虛豈知身亦屬螟蛉

巫山圖

朔風捲地聲如雷西南想見巫山摧江南圖籍二百
年一炬盡在江陵灰不知此圖何所得眼中十二猶
崔嵬猿聲髣髴餘山哀行雲欲行行復四神宮縹緲
望不極乘風御氣無九垓區區雲夢蹄涔爾豈知更
有陽雲臺

李賀醉吟圖

赤虬翩翩渺無聞望之不見矧可親浮世浮名等濁
溷眼中擾擾投詩人心肝未了人間春龐眉尚作哦
詩顰太平瑞物不易得昌黎仙人掌中珍北風瀟瀟

吹野麟千年淚雨埋青雲乾坤清氣老不死丹鳳再
來須見君

後賦赤壁圖

公無渡河歸去來周郎袖裏藏風雷老狐千年快一
擊金眸玉爪不凡材先生平生兩賦爾江山華髮心
悠哉只令畫裡風月笛尚有老驥西風哀眼中驚波
不西歸玄鶴夜半從天迴曹劉閑氣今何處船頭好
在白雲堆

陳氏莊

陳氏園林千戶封晴樓水閣圍春風翠華當年此駐

驛太平天子長揚宮浮雲南去繁華歇回首梁園亦
灰滅淵明亂後獨歸來欲傳龍山想愁絕今我獨行
尋故基前日家僮白髮垂相看不用吞聲哭試賦宗
周黍離離陳氏先父之外家也金章宗每遊獵必
宿其家淵明謂先父龍山指孟嘉事

采石圖

何年鑿江倚青壁乞與中原作南北天公老眼如看
畫萬里才堪論咫尺蛾眉亭中愁欲滴曾見江南幾
亡國百年回首又戈舡可憐辛苦磯頭石江頭老父
說當年夜捲長風曉無跡古人衮衮去不返江水悠
悠來無極只今莫道昔人非未必山川似舊時龍蟠

青仙文集 卷之四 七
三見李栢刊
虎踞有時歌月白風清無盡期古人看画論兵機我
今看画詩自奇平生曾有金陵夢似記扁舟月下歸

金太子允恭唐人馬

道人神駿心所憐天人龍種画亦然房皇流光忽當
眼徑欲攬轡秋風前漢家金粟幾蒼烟江都筆勢猶
翩翩東丹獵騎自豪貴風氣惜有遼東偏天人秀發
長白山畫圖省識開元年金源馬坊全盛日四十萬
匹如秦川天教劫火留此福玉花浮動青蓮錢英靈
無汗石馬復悲鳴真似泣金仙只金回首望甘泉汾
水繁華鴈影邊奇探竟隨轍迹盡兀坐宛在驂騑先

人間若有穆天子我詩當作祈拓篇

宋理宗書宮扇 并叙

杭州宮扇二好事者得之燕市一畫雪夜泛
舟一畫二色菊理宗題其背有興畫為期及

晚節寒香之句諸公賦詩予亦同作

天津月明啼杜鵑梁園春色凝寒烟傷心莫說靖康
前吳山又到繁華年繁華幾時春已換千秋萬古合
歡扇銅雀香銷見墨痕秋去秋來幾恩怨一聲白鴈
更西風冠蓋散為烟霧空百錢鞞錦天留在袖胎要
鑿驪山宮當時夢裡金銀闕百杯樓前無六月瓊枝

青什文集 卷之四
秀蕝後庭春珠簾晴捲天門雪棹歌一曲白雲秋不
覺金人淚暗流乾坤幾度青城月扇影無情也解愁
五雲回首燕山北燕山雪花大如席雪花漫漫冰我
我大風起兮柰爾何

續十二辰詩

飢鳶嚇鼠驚不起牛背高眠有如此江山虎踞千里
來才辨荊州兔穴爾魚龍入海浩無涯幻境等是杯
中蛇馬耳秋風去無跡羊腸蜀道早還家何必高門
沐猴舞豚穽鷄栖甘樂土柴門狗吠報隣翁約買神
猪謝春雨

送徐生還鄂 并叙

江夏徐生東湖故家庚申北渡客燕趙
十七年而宋亡其子姪書來迎之而還
蓋前所謂黃鶴歸來疑城郭之猶是
浮雲一去惜人代之俱非者也諸公賦
詩以道其行命容城劉某叙而倡云

燕山送客歸南州興來每恨無扁舟君歸為我謝江
漢思君不見令人愁千里風煙想蕭洒一代英雄成
古丘當年才氣鸚鵡洲撫掌笑殺黃鶴樓黃鶴歸來
哀江頭江山依舊人悠悠浮雲萬古恣變滅眼中擾

擾何時休紫陽仙人歌遠游飛蛟起滅三千秋為君
揮手崑崙頭紫陽謂晦翁飛蛟起滅見遠游集注

蠡吾王翁畫像并序

蠡吾王翁世為農家多蓄粟金源貞祐
初宣宗南渡河朔大饑翁于是蒞之全
活者甚衆時鄉豪在所皆自樹慕義者
咸欲推公為首翁不許挈家避地扶溝
餘二十年而汴亡天下蕭然蕩為丘墟
翁家獨無恙而歸子孫讀書不求祿仕
三世皆以壽終殆不偶然也翁之曾孫

天輔求予叙翁之行義於其畫像謂庶
幾能聞之名士大夫而有以蒞潛德之
幽光也

北門翠屏雷破山畢通頭白五馬遷乾坤運會到血
肉有欲脫之誰飛仙河朔諸州尤可憐有饑一來無
此年鄉閭教傲公哺之公困有底心無邊諸豪推唱
彼亦義亂世性命公能全教子讀書不求官歸來素
髮家山前天理不隨陵谷變坐看老樹生蒼煙只今
畝畫對公像回首兵塵一慨然誰能生死太平日白
石共煮西山泉

宋徽宗賜周準人馬啣

筆底金鞍有蕭爽誰云不博降王長汴梁門外若雲
屯畫本相看應自賞十載青衫夢故都經營慘淡欲
何如只除金粟呼風鳥曾見招陵鐵馬趨

宋高宗題李唐秋江圖

秋江吞天雲拍水濤借西風挾不起斷雲分雨入江
村回首龍沙幾千里澹庵老筆搖江聲髣髴阿唐慘
淡情千秋萬古青山恨不見歸舟一葉橫

宋理宗緝熙殿硯

使君持送緝熙硯捷音才到山中人四十三年如電

抹此硯曾經秋涼春寂寞吳經筵勸講臣詩酒宮中樂
事新文章只數天中月萬卷何曾筆有神

宋度宗熙明殿古墨

江南賜姓功臣李吾州奚生墨工尔江南赫盡吳山
松吾州老樹搖晴空君王美墨熙明殿不覺江頭度
白鴈劫火猶解愛庭珪吹送山家易水西松風含哀
生硯滴似訴優游解亡國只今誰有哀江南寶氣不
受鵝溪纈早晚扁舟遠吳越為君揮洒天門雪

金太子允恭墨竹

黑龍江頭氣鬱葱武元射龍江水中江聲怒號久不

馮破墨揮洒餘神功天人與竹皆真龍墨竹以來凡
 馬空人間只有墨君堂何曾夢到瓊華宮瑤光樓前
 月如練倒影自有河山雄金顧大定始全盛時以漢
 文當世宗興陵為父明昌子樂事孰與東宮同文采
 不隨焦土盡風節直與幽蘭崇百年苗藉有蕭相一
 代英雄誰蔡公策書紛紛少顏色空山夜哭遺山翁
 我亦飄零感白髮哀歌對此吟雙蓬秋聲蕭蕭來晚
 風極目海角天無窮黑童江見金史幽蘭軒義宗死
所汴亡張蔡公以金寶錄歸遺山嘗就公勝錄此軸
亦公得于汴之中秘者公之子仲仁持以求子詩故

終篇及之

白鴈行

北風初起易水寒北風再起吹江于北風三起白鴈
 來寒氣直薄朱崖山乾坤噫氣三百年一風掃地無
 留錢萬里江湖想瀟洒佇看春水鴈來還

渡白溝

東北天高連海嶼大行蟠蟠如怒虎一聲霜鴈界河
 秋感慨孤懷幾千古只知南北限長江誰割鴻溝來
 此處三關南下望風雲萬里長風見高舉萊公灑落
 近雄才顯德千年念英主謀臣使臣強解事枉着渠

頭汗吾鼓十年鐵硯自庸奴五載兒皇安足數當時
一失渝閔踞便覺燕雲非我土更從晚唐望沙陀自
此橫流穿一縷誰知江北杜鵑來正見江東青鳥去
漁陽柝鼓鳴地中鷓鴣飛滿梁園樹黃雲白草西樓
暮木葉山頭幾風雨只應漠漠黃龍府比似愁岡更
愁苦天教遺壘說向人凍雨頑雲結淒楚古稱幽燕
多義烈嗚咽泉聲瀉餘怒仰天大笑東風來雲放殘
陽指歸渡

過易州登西樓

秋氣壓山山欲摧西樓正有詩人來悲歌感慨聊一

發萬古抑鬱今崔嵬寧山為有瀛王臺頑痴至今如
死灰幽燕勁氣老益壯北山飛翠來吾杯

登鎮州隆興寺閣

大行鱗甲搖晴空層樓一夕蟠白虹天光物色驚改
觀少微今在青雲中初疑平地立梯磴清風西北天
門通又疑三山浮海至載我欲去扶桑東雲華寶樹
忽當眼拍肩愛此金仙翁金仙一夢一千載騰擲變
化天無功萬象繞口恣噴吐坐令四海皆盲聾千池
萬沼盡明月長天一碧無遺縱我生玄感非象識此
眼此臂將安庸海岳神光埋禹鼎人間詭態何由窮

金天月窟爾鄉國玉毫萬丈須弥峰一杯徑欲呼與
語為我返駕隨西風堂堂全趙思一豁江山落落吾
心膏中原左界此重鎮形勢彷彿餘兵衝歌舞遺臺
土花碧旗幟西山霜葉紅乾坤割裂萬萬古烏鳶蟻
蟻為誰雄潯水悠悠自東注落日渺渺明孤鴻

乙亥十月往平定早蒺土門宿故關書

所見

風煙全趙如平掌失脚山城夢猶想土門一縷漢時
天萬古行人為誰仰指似勅敵談笑中為狀羸僕恐
寒強當年鼓角如可聞急着清吟和林響遠山宛歆

牙相迎近山留人屹相嚮或從井底忽登天倚伏已
能先想像平生夢山真惡識今日果為山所網昨朝
爽翠擁脩眉寂恨高樓負清賞壯懷鬱鬱悶歎絕安
得凌風恣吾往天教石頂放一頭駃若驛驢脫羈鞅
山靈努力出奇供只恐先生駕虛枉萬壑霜松動悲
嘯極目雲烟埋北門形勢護中原辨與姦雄增
技癢太行橫絕半九州留在平原幾塵埃何人為我
起六丁嵯峩盡隳天宇朗千年再挽神禹功恍若鴻
流開四象

范寬雪山

老寬曾次無墨汁經營慘淡寒生須秦川名山古壯
哉况復玉立千尺孤安得辰光滿東壁試看龍燭崑
崙墟赤塵鴻洞天為爐一丘一壑真吾廬眼中人物
誰水壺

霸陵面

霸陵平生有詩境黃閣何物為清感鄙五自知非相
才猊猴枉畫凌煙中位傭莫作詩家傭百為淡苦誰
汝供古人星露尚有戒况是風雪來無窮襄江明日
蒲萄暖斜風細雨缸頭轉門前暮雪吾不知坐上春
風人未遠

趙生水墨扇

南山鬱鬱煙霧濛北山落日薄幽叢先生眼花臂猶
健聞虎有真心愈雄聲絃寄日黃蘆東人言此是高
堂中仰天大笑出門去時危慘淡來悲風

仲誠家藏張蔡公石女剪製香奩絕巧持以
求予詩

靜華墨君天下奇陵川僊人為賦之遺山野史誇慧
女萬古春風蝴蝶詞豈知此巧復絕代夜月靜拂天
孫絲夢雲絲雨有形外郢斤庖刃無心時蔡公凜凜
褒鄂安諸郎畫戟清香詩香奩秀發亦餘事詩人飢

眼省見稀敲門青燈爛紅碧布衾驚走惡睡兒破屋
猶疑翠鯨怒短褐誰憐紫鳳移東家健婦把鋤犁西
家處女負薪歸哀哀正念誅求苦對此無言空淚垂

張元帥寶刀

土不產金人氣雄真人握鐵開鴻濛不知此刀何所
得風煙餘烈來霜鋒將軍聲名今蔡公酒酣過我歌
彤弓持刀對公兩奇絕眼中已覺南江空木波江聲
浩無窮朝礮夕淬天有工回鶻健兒戲天巧前身鐵
精非凡庸然煙焰天為紅鑲紋秀發青芙蓉寶鏤
搖落初開封四壁如著清水中天山積雪聚鏑鏑寒

色直欲朱崖通摩挲神物三太息此行善保千年功

山行見馬耳峯

近山豪士少羈檢酒澆不下膏崖崑遠山靜女亦閑
雅尚恨少有傷春懷亂山米聚爭拱揖武卒侍婢皆
凡材天知老眼不受塵路轉忽睹雙峰開雙峰何年
聳雙耳叱之不動煩風雷今朝向我効神駿翠色欲
逐神鞭來浮世浮名酒一杯我欲駕此觀蓬萊只愁
日暮三山上黃塵回首令人哀

雪翠軒觀大寧

吾家雪翠天下白銀河無聲月無色天關不閉寒崢

青竹
卷之四
百十八字時
嶸箕尾晶英凍將圻帝遣六丁下取將勅賜名軒換
金碧初如紫霧蟠青雲飛卜人間作墜壁漸如扶桑
六龍出萬縷丹霞吹海立何人辨此女媧氏補天重
煉蒼蒼石陽能蕪陰今可知祝融若并玄冥國正教
蕪穢洗歆空誰為千年棟樑惜殺機如火出至微焰
焰寧知有今夕軒中高卧劉更生願借餘光照方冊
方冊有道出黃虞今古煌煌天與極火耕明日千萬
斛酒瓮已聞春雨滴不妨一飲盡群山醉暈春生半
天赤

雪浪石

邵家水陸說影象一物自可涵無垠滄浪仙人歌感
應石中固有此理存老坡曾中如此幾硯磊湏得銀
河噴嘲嵩唾華天不嗔武夷赫怒張吾軍偶從北海
得生氣竹石也愛風姿新我來正當秋雨霽一杯冥
漢玄都門小璫好事如先臣坐令平地石生根渠家
兒戲解忘國作詩一笑君應聞

煙霞觀雲巢松

盤柯盤屈今幾時龍攀虎跛森英姿道人眼中無可
怪一巢見餉吾何疑我所思兮穎與箕秋聲瀟瀟吹
送之清風一披雲一席松中之樂天不知靈臺方寸

青竹文集 卷之四 十一 三百千資
有君節虛籟萬古絃吾詩歲晚相期君與我笑拊吾
髯盡此卮

瘍醫詩卷

煉心如石補天缺煉心如泥補地裂白墓正飽丹鳳
飢心能竹實亦能鐵乾坤瘡痍今幾年誰家藥籠金
石堅千金此方不一試雲山注目秋風前

明河秋夕圖

明河澹澹縱復橫行雲悠悠度疎星鳳媒不來烏夜
驚瓊枝玉佩遲所託畫中隱隱聞機聲秋來秋去今
猶古此限不隨天宇青崑崙西頭風浪平辨我一舟

蓮葉輕浩歌中流擊明月九原喚起嚴君平人間此
水何時清

美人

美人娟娟秋水隔煙霧淚沉蒙玉質目逐晴波去不
歸遙山只有行雲碧碧雲日暮心悠哉窓前一夜梅
花開平生自信心如鐵一寸相思一寸灰

玉簪

春色醉人人未醒獨憐月露秋零丁昭陽日影巧相
避寸心未減寒冷只應得我一顧足為君小醉秋
風亭蓮兄君子菊弟隱何物處君君意肯玉簪玉簪

青竹文集 卷之五
誰與簪蒼苔 踈雨秋欲沒

荆南送橘

江淮草木少生意 今日佳果來何奇 枯苗一概自此
見入手 即有甘棠詩 眼中風露瀟湘姿 渺我幽林千
樹思 只恐江聲撼吾枕 相看坐對寒更遲

食筍

夢迴藍頰風蕭騷 幽姿不許霜松高 南來蒼玉不盈
束 已覺飲興翻雲濤 詩家宵次自宜此 尚嫌煙火須
烹魚 想像南風吹萬竹 籜龍正恐稱冤號 石盆養魚
心自苦 仰羨鸚鵡鳴雲間 巢眼中歲旱土不膏 長鑿後

慮山無毛 退食歸來北窓夢 山巔朱鳳聲嗷嗷

王君奉命賑濟彰德過于求詩

十年監官窮到骨 一簿武邑如登天 巧宦絲絲日九
遷 白髮青衫獨可憐 昨朝讀君阜民篇 善察物情亦
已賢 南郡飢民想更苦 以君賑濟非偶然 驛傳星馳
乃尔急 何暇載酒揚雄玄 茅容問稼當有語 野夫憂
國頌豐年

送寇長卿同知岳州

聞君得官岳樓去 我夢已落江湖濱 天下先憂付公
等 江山之樂當年分 荆湖一城百戰得 存撫安得人

人君岳陽父老宜相賀君是荊州舊幕賓
廬荊州
治稱第一

三月三日許天祥置酒東城

都門氣習慕翩翩此君尊俎今宛然
春色今年遲半月留待忽忽過寒節
臨流雅唱尋舊盟青眼青天對
今夕橫橋綺服麗人天蒼苔坐我
羲皇前花枝華髮兩如許天意時
情一杯舉安石起舞元龍歌蒼生
我竟如渠何

飲仲誠椰瓢

君家瓠落無所容江湖誰辨平生
曾海南佳氣久鬱

塞灩澦似喜今相逢前年對酒面
黦紅今年對酒氣如虹江山萬古
騷人國跬步便與華胥通河間古
儒病我拘聞我一飲喜氣濃平生
得意南湖張此意頗興河間同太
古窪尊老無底一朝傾倒何由供
醉鄉千年有此客鳥歌蝶舞春濛
濛醉翁之意不在酒宛如琴意非
絲桐太和風境無醪酖洛陽樓閣
高玲瓏冷然仙馭一杯水眼中渺
渺無極翁西家伯倫瞽且聾東家
醉死王無功酒中醒境渠未識冰
壺秋月崑崙峯舉杯喚月來曾中
人間白日浮雲空五嶺山高雲幾
重朱崖滅沒南飛鴻玄鶴翩翩渺
何許操瓢從

訪眉山公河間謂趙玉南湖渭仲實冷然仙馭一杯
永見滿延之和茂叔憶濂溪詩洛陽樓閣身夫空
中樓閣事

南溪行

老人耕牧南溪南南溪草淺牛所貪大孫携書小携
酒青藜為席樹為庵以書教孫仍自讀隔溪遙聽聲
誦誦牛眠樹陰孫勸酒老人未醉意已酣老人氣高
軀幹小面狹於髯森若杉年周甲子辰又泐世故十
率八九諳早歲精勤傳世業口誦太素手弄甘以藝
黻身寧久屈安車徵起詔使監入為天子侍從臣龍

沙萬里嘗陪駮鼎湖白雲望不極招之歸來山有嵐
身出夢閑涉覺境人間萬有皆空函侍從之名不復
記老人自署南溪術呼兒來前雙玉立曰我愛汝擇
所堪自我中年學讀書方寸若有神明鑒活人之功
豈不美一有不中中或慙青囊祕封不再展塵跡從
此乃一菱讀書力田兩交進困有所收心有函開此
樂園自我始繼而大之在汝男我今已成齊變魯汝
等當為青出藍東北一舍容城翁今年卧病家山巖
其室雖近人甚遠汝糧自裹簷汝擔雪中款段來叩
門僕夫汗流扶酒甌侑尊有物隨土產厥色雜進鴨

與鶴飲劇談羨不自禁四鄰驚走來窺探先生靜默
如土鍾叩之愈大聲愈鶴今朝音吐馮河漢老人者
誰開其緘斥之令去不復語與亡萬古手與談空鈎
意鈎不在棊澹然相對如禪龕老人思家不可留二
兒扶歸杖几然臙醅開時魚可膾相約載酒游溪潭

送王之才赴史館編脩

太古熙熙存太質誰為結繩陷膠漆三墳五典生厲
階一派前道千流出商周顛噩數千年刪定塵編終
半壁自從盲叟好浮誇天遣阿遷奪其筆歷代煩
愈是非鑿碎名山蔽不得偉哉君實集大成爾後不

聞麟再泣遼金邪魅無人誅略主英臣少顏色策書
未削徒紛紛常恨天孫惜刀尺公耽史癖今史榮姦
魂夜哭崔浩直善惡磊磊軒天地筆頭休放波濤息
賤子蕪絕寂寞濱畔牧河山拾古迹悲愁忍效虞卿
窮蒼黃敢召台州謫中原人物有權衡玉堂誰擅才
學識山東麟鳳半青雲燕南獨占天荒隙公能一奮
天下文袖手傍觀甘自適

同仲實南湖賞蓮醉中走筆

湓江泚寒風露涼安得置我瀛溪堂香塵縹緲芙蓉
裳百年得此南湖張舉杯人勝境亦勝有蓮以來無

此香蓮香隨酒來詩腸浹句驚起幽禽翔幽禽隨人
佐婦態意欲和我風零狂人間一味清到骨兩足暫
付吾滄浪螟蛉螺羸卿且去醉眼太華雲間蒼

明遠堂賞蓮醉賦

畫堂香遠凝清秋宛如坐我南湖舟主人愛客情亦
重謂永無語花應羞荷香繞筆詩自健滿紙已覺清
江流平生老氣回萬牛為君傾倒元龍樓舉杯喚起
謝安石我醉不省蒼生憂

元章論書帖

書家豪猛見世變寥寥鍾鼎今幾塵古人胸次無滯

迹意外蕭散餘天真愛書愛畫即欲死狂絕俗絕無
此人臭穢功名皆一戲渠言夸矣君勿聞

阿寅百醉

南湖風鑿不多可詩中驚見阿寅名朝來抱來聚星
亭神涵秋色啼古聲都山張氏世有賢斷崖近得唐
碑銘乃翁家莫老窮經阿敬健筆數中勳循環元間
豈終晦開物有期須一鳴老夫自任河汾教先為虛
席待此生

友人送枳朮丸

心胸未識黃昏湯無食何用求檳榔書生但苦湯餅

睡巴椒慘慘無鼠腸舊聞易水仙翁術綠荷色飯圓
枳木南州故人持送我但欠黃雲數千斛笑撫青囊
時一鼓徒啖何由酬此腹

記夢

天風吹雲送星槎蒼鱗道前牽紫霞鳳凰呈舞月妃
和飄飄來自金母家金母臨行有奇贈玉簫瑤管聲
清佳囑我醒時無泄露恐世知子生喧譁明朝夢覺
莫驚怪異香冉冉浮窓紗

又

眼中雲物徒紛紛一掉頭殊不聞天風瀟瀟燈半

滅忽爾雲間見雙闕欲吐不吐三萬言雄鷄已落長
庚前林前阿魯讀魯論到植其杖而芸田

靜脩先生文集卷之四

靜脩先生文集卷之五

容城劉因夢吉甫著

五言律詩三十七首

除夕

百歲三分一初心謾慨然空囊難避節青鏡不留年
靜閱無窮世閑觀已定天履端思後日四鼓未成眠

晚上易臺

遺臺連廢壘落日展遙岑海嶽天東北燕遼世古今
每當多感慨直欲罷登臨莫更留塵跡千年不易禁
登武陽

朝遊樊子館晚上武陽城潮接滄溟近山從碣石生
斷虹雲淡白返照雨踈明且莫悲吟發樵歌已愴情
鄉郡南樓懷古

南北世更迭江山人重輕澶淵出師詔顯德受降城
遺恨幾時盡寸心千載生區區蓼花詠癡計欲何成

滿城道中

學館三年夢西山此日行人生兩屐足世累一簑輕
別澗水流合斷林烟補平誰能分半壑相與結嚴耕

夏夜

院靜復夜靜幽人世慮輕是非容勿辨憂寵莫多驚

萬樹烏飛月千家犬吠聲夢回無一事惟有紙窓明
重游源泉

人世自人世備然物外身滄溟來照影白帽恐生塵
題壁雲封石攀花鳥護春今年風景別開卷覺詩陳
張氏別墅

惡木推不去好山招未來豈無平曠地當有妙高臺
芳草趁陰坐雜花隨意開東南村落近試與問新醅
書堂旅夜一首

少小抱孤苦飄零重此行迂踈從我好憂戚賴天成
夙志存無幾羈懷觸又生寸心同弱草歲晚怯霜清

淹留已半載去住意何深月色一千里愁人方寸心
秋聲助搖落生理嘆浮沉松桂清霜滿哀歌動故林
生日

四十舉兒子明珠掌上希圭童蒙養正朱蚩病防微
春露有時降孤雲何處飛悲歡共今夕餘涕不勝揮
虞帝廟

淫祀徧區宇空山餘帝宮皇靈有天在像設與人同
身世千年後塵埃百感中清泉分一酌毛骨潤南風
奇村道中

此日西塘踏乘閑作勝游潏潏柳成巷脈脈稻分溝
白石長含雨黃花不受秋移居新有意試就野人謀
城南

山人懶到骨一出動經秋欲赴城南約如營海外遊
岸容收潦盡村色帶烟留禾黍歲將晚農家猶未休
有客

有客談稼穡對人增感傷自言二頃業不博半年糧
宿麥得春早晚田經早霜無功一杯粥俯首汗如漿
早行

曙色警初動物情無久閑薄凌護頽岸落月淡空山
殘夢失逆旅少休期守閑尋常午窓雨擁被聽珊珊

白菊

仙草尚孤潔東籬芳未芳精神渾是露氣勢已無霜
夜月歲不得晚風吹又香天教陶靖節素歎與交光

水亭夏日

孤亭耿獨坐一碧淡凝秋氛雜市聲遠空明雲影留
傷時仍磊砢對景即休休幾欲解維去乾坤無釣舟

野興

乘興閑登睡歸來晝掩扉靜中見春意動處識天機
大節始終論全才今古稀平生有舊約常恐寸心違

秋望

病骨秋偏早單衣露尔寒微雲生水際暝色起林端
地迥月遲下樓高山易殘輕風吹欲舉醉袖拂層峦

雜詩五首

堯山唐故國淳朴帶遺蹤種粟收奴力開田享素封
來収多上藥景仰近研峯夢寐驅黃犢巖居一老農
巽北高寒境英靈海嶽全斯丈若程邵家世亦幽燕
祀典令誰舉遺經會有傳吾鄉此盛事瞻仰在他年
何事招提好山溪馬可驅松巢低暎帽竹溜細通厨
霜粟千封戶雲屏四畫圖冠巾如我用白鹿起規模
巖居訪高道少日在風塵回首話前事佯眉厭此身

江山寶寇盜田畝化荆榛領取天倫重無君愁殺人
水遶千山合雲巖數畝荒初尋香有陣漸入翠成行
豚穿依危石牛蹊荒小塘團茅菴如画可惜是逃亡

早發濡上

寒出防優逸詩情正浩然烟濃山失色雲重雪連天
坏戶仙游上水躡上境前別家忘再宿桑海問何年

偶書

擾擾推遷裡誰知不偶然要從人力外推見事機先
青白天公眼低昂也物權俗情謾悲喜倚伏有他年

宿田家

偶到田家宿歡迎如遇仙杯盤陳戶側妻子拜燈前
青白眼誰靜炎涼情易偏豈知人世外還有野夫憐

半世

半世恒棲托孤生被險艱寡言非蘊蓄福性類清閑
生計朝霞上交情暮雨間柴門本無客幽僻况長閑

重渡潯沱

遙臨潯水岸回望土門關秋色嶢巖上川形拱抱間
分彊人自隘設險地誰慳欲問前朝渡江鷗故意關

恒山樓

萬嶺尊恒嶽遺臺枕後潭仰高慙對坐哭險負奇援

影落落漠北雲開斗柄南山靈憐野客今夕費烟嵐

登鎮州陽和門

百尺市門起重過為暫停豪分秋物色米聚趙襟形
北望雲開嶽東行氣犯星憑闌天宇在人事聽浮萍
辛巳中秋旅亭獨坐

分光陰太盛無力掩蒼漠大塊供微黑高天失舊青
興從愁外發秋向露邊零點數山河影依稀見草亭

文章

文章費餘力齒髮愧初心璞有連城璧精非百鍊金
靜中天地我閑裡去來今鳥散爐薰盡長歌激暮陰

一身

一身能換骨毛髮散冲融氣變精神後人生感化中
朝陽方杲杲春意正濛濛百載唐虞德方成比屋功

周邵

百年周與邵積學欲何期徑踏寬平處襟懷洒落時
風流無盡歲光景有餘師辜負靈臺境圖書重一披

上塚

過家來上塚顧影念孤蹤春露歡迎失寒泉感激濃
千金一毛髮十夢九音容不惜從黃壤多慙未了膏

書堂旅夜

青竹文集 卷之五 二百九十三
丈室不自掃寸心徒尔豪世途仍險阻風物故蕭騷
皓月霜洗淨明河天放高空庭一片石獨坐首頻搔

過唐水望堯山

神化大無外名山能幾峰威顏渾咫尺天日尚雍容
蒲坂堪飢死重華有舊蹤三謨讀未老於此卜巢松

過奉化先

閩遼承宋統此志亦雄哉置縣名猶在因山勢已摧
百年元魏史千古汝南京華表鶴應有悲風海上來

雜詩二首

聞昔飛孤口竒兵入擣虛人才九州外天道百年餘

草木皆成騎衣冠盡化魚遺民心膽破諱說戰爭初
關嶺通山後風謠採踞傍地寒人好壽草淺畜宜羊
用水如奴婢從川貯米糧西風如有約乘興即吾鄉

野興

莽匕榛蕪踞虫匕魚肉民乾坤幾逐鹿今古一傷麟
眼底人間世育中物外春江山滿花柳無負百年身

秋日

山人久不出今朝天氣清秋光濃可掬草色翠相迎
捫蝨暮山碧敲門新筍生歸來重回首佳處未忘情
山中憶故人

故人南郡去消息久無聞
瑤草正堪種百雲誰共分
屋梁驚落月鵬翼賦垂雲
歲暮一樽酒高歌如見君
夢採松脂及甘菊

棲遲負松菊夢寐得甘馨
隱逸喜同臭流高味獨青
人誰借三徑天欲制頽齡
毛骨清猶在桃邊霜露零
種杞

法出千金要畦容一席
分灌苗身已健採實夢先動
白棘憑誰辨靈庵只自聞
知音九節杖惟有華山雲
戲荅人送鹿皮冠

糜鹿山林性文章冠冕材
頭顱如有此巖穴更悠哉

老筆天機在空梁
月色來桃榭應似我
人世莫驚猜

觀藥爐自戲

無病不服藥康節語也
此懷清更嘉歐陽或有道
韓子豈無瑕羸疾嗟子久
名方信波誇回頭謝鷄犬
何日是僊家退之服硫黃
一疾訖不痊樂天詩也
赤松共游也不惡誰能恐
飢啖仙藥已將壽天付天
公彼徒辛苦吾差樂東坡
序歐陽子語也

地髓服仙草黃精失採花
徵求遍親友炊爨罄樵車
屢敗從人笑偶成容我誇
側聞僮僕語辛苦是仙家

閱竇氏名方

人從大節論士尚絕無求獻可有先見老泉多遠憂
方書空物齊耆舊盡山丘矯首候斜日窓中倦鳥投

眼醫詩卷

火景元中暗月光徒外明每當天抹漆未便目無睛
暗自何年有明從底處生若知當告我心事在蟾精
楮母節孝詩卷

寂寞吾鄉國才難婦愈賢題評慚我後旌表聽人先
艱苦初心盡安榮老境偏幽潛天有待留看百來年

張監院過

有客敲門久山人與鶴歸論文翻草本換酒當蓑衣

暫會還成別相歡且莫違明朝誦佳句北望謾依此

寄彥通

吾子今應健山人老已癡迷藏高着眼興廢大觀基
感遇渾非昔忘懷若有思絃歌吾舊隱寂寞暮春時

送友生

無人慰幽獨之子罷登臨野鶴籠中態翔鴻天外音
吾儒關世運晚節見初心有問山間事白雲今更深

盧學士按察江東

不廢芻蕘賤狂言試一聽品題停月旦言動律東銘
飲少詩真樂吟多損性靈清灯四書外澹泊養遐齡

郭判官按察廣右

謝病三公掾分司五嶺南柱山天下秀憲府百僚叅
夜泊防風浪晨征避瘴嵐遙知慈母念先汝過湘潭
張察院分司臨安

餘杭古佳麗御史重分司甘旨足為養江山能助詩
梅花春早晚潮候月盈虧糾察先從此陰陽恐失宜
送仲常游北岳

大茂玄都闕六山拱萬靈風霆凜神化河海盡襟形
昂畢空留影幽并未了青追風王制變僭祀世塵腥
禮樂心雖切煙霞骨有銘長懷七十五為我謝僊扃

送郝季常赴正陽幕

上黨清涼界超然慕白雲名家得之子勝境苦平分
鼓角生新壯詩書失舊勤江淮古形勢有樂在從軍
送成都術士

邵子不言命相逢盡此觴風煙雙白鬢身世一青囊
玉壘浮雲變峨眉落日蒼西游吾有意先為謝嚴揚
宣慰孫公慶七十詩并序

至元二十七年冬與處士張君察院
張君提舉郭君都事張君飲教授趙君所
工匠提舉孫謙繼至察院曰是家古世

官也將甲氏四世矣今其翁正議公階
是為宣慰使歷事四朝登秩二品有子
若孫皆佩金紫開歲七十尚躍馬不衰
維爵與齒實一鄉之望凡所與游禮宜
往慶在吾輩慶宜有詩於是約各為詩
一首言韻古律不拘既成俾諸孫捧觴
歌以獻壽公宜每篇為盡一觴不辭十

二月二十九日樵庵叙

為仁存世職得壽見陰功家產千金厚官銜二品隆
子孫皆貴顯飲啖尚豪雄五福誰全備吾鄉有此公

何太夫人壽二首

近親宜致敬結友合升堂薄俗隨遷變淳風墮渺茫
吾人今復古此日得稱觴高詠靈椿句燕山暮色蒼
去歲稱觴後今朝重過庭將軍不好武宅相舊明經
拙宦供行樂忠臣見典形北堂多竹石歲晚亦青虀

示張源

堂高餘慶在道重魯齋傳洗眼名家後驚心大學年
白頭負風鑒青佩見時賢明日鹿門隱須君拜我前

感事

間氣來西極逢時稱世賢學隨人望盡家要後生傳

魏野赤松句堯夫樂社篇卜隣

聞計重淒然

贈荅徐生

三年不窺牖城府有山深於道無少得
多君肯見臨一盃上地飲千古水仙音
為子終宵話相期勞寸心

旅夜

歎枕寐無寐沈思坐不禁靜中天地
永閒裏去來今磊々平生事休々
今夜心何方有邊成雲外急清礎

虞帝廟

四顧莽何際威靈儼若臨山川尚淳
朴天地自高深鳳鳥千年嘆簫韶
三月音玄功久無復徒抱致君心

登保府市閣

十載鷄泉隱今朝市閣晴民謠混
諸國里號帶軍營瀛海依々見堯
山隱々橫懷今與思古獨立若為情

憶金坡道院

平昔多游覽茲游不易忘溝涂春脉
々松石晚蒼々有客愛山谷無家名
草堂金坡從此號聊著永相望

寒夜

肝膽了無寐襟懷誰與同更長頭可
白燭暗火逾紅硯滴水生癭星流氣
吐紅林鴉先我起鳴噪竟何功

移甘菊

移晚戒前歲植根先此秋親嘗杖履遍嚴課僮憂
小藥終年計新蕒一飽謀區區嘆莎棘陸子謾多愁

採野筴

糞壤自肥膩靈苗絕世紛炊餘香更美甘出苦難分
宜酪法新得輕身方久聞野人聊自烹未敢馭吾君

食菰白

採食陂塘利分甘野老心杯盤收浩渺蘋藻避清溪
命婢即能識招隣亦見臨吾鄉希此味咀嚼有吳音

酒令

觴至欲何語令嚴當謹聞茅容唯問稼李白只論文

且喜無多客母辭過半醺故人知此老舉白解浮君

蕩尊宋初監索賦

南國有奇竹天然成酒尊來因交趾使價重祕書門
含蓄中誰似堅貞節尚存盤桓古人意觀象可忘言

鸚鵡

風雨房櫳暗猶疑隴樹昏無愁緣得食有夢想高翻
巧語難自脫浚憐未是恩人情多好異渠豈不能言

末道人八十詩卷

往事枕中記新編柱下言知音有銅狄逸史訪金源
春露霑濡際秋陽想像存初逢疑夢寐垂泪拜桓温

宋貌絕肖洗子

鄉人王母九十

九十青瞳母寒溫白髮孫
業田閱滄海冠帔記金源
案上春風橘堦前雪色萱
移家就鄰舍種杞易陽村

寄荅祖丈

先友從遊地雍容几杖尊
秋風太古觀春日樂郊園
妙理欲自得高情誰與論
別離空六載期待負知言

楊子忠總管福州

燕趙多豪傑楊侯氣自奇
風流猶世胄開爽亦天資
尊俎論交地江山送別時
閩中有佳政聊用慰相思

送尹宰

百里衝山縣千年陸宰名
隣封今見此鄉校可無訐
俎豆歆成趣絃歌漸有聲
涑陽吾舊隱聞去亦關情

送成判官

釋菜成鄉約從君此例新
歡遊渾幾日離索又殘春
相愛求詩切臨行枉駕頻
幾年人事絕送子為情親

送成從事

易水河梁夢回頭已十春
相逢驚我老送別向君頻
求贈攀前例將詩認故人
故山松菊在歸去未全貧

寄子東太守

一夕西山客十年往事非黃塵驚我老青眼似君稀
別浦秋容靜離亭草色微殷勤重寄謝後會不應違
送東海相士

青鏡雲千變紅顏酒一卮忘言三日雅觀化百年期
烈火誰當抹神游亦自竒海山如見問聊舉送君詩

感范女

房望吳中范衣冠相國孫風流猶李白樵爨已陳雲
感事哀龍種慕名重虎賁乾坤厭更迭誰與抹絲

贈荅學者

士論清脩品天然孝友資從遊無少補離別有沒思

貧說長年在文驚近日竒吾言不足重愛子欲何為

西市藥隱

之子隱於藥四休今不孤藏名那論價得號尚嫌壺
知足隨處樂忘撓一事無東隣開小徑茗椀不須呼

獨立

恒岳精英大直衝昂畢星初疑元氣白橫界太虛青
欲與河漢共不隨霜露零相看一杯酒連夜立中庭

嘉甫從親王鎮懷孟

茲游真可樂兔苑更扮揄孝弟燕南選文章郝氏徒
早年多急難晚節足歡娛寄語賢兒姪詩書是遠圖

集杜句贈王運同彥材

霄漢瞻佳士公侯出異人家聲同令聞文雅見天倫
玄朔巡天步危樓望北辰燕王買駿骨黃閣盡麒麟
紗轡期元宰蒼生倚大臣蛟龍得雲雨鵬鶚離風塵
治國明公在雄圖歷數屯世儒多汨沒賢俊贊經綸
開闢乾坤正調和鼎鼎新弼諧方一展風俗盡還淳
經濟宜公等泥涂任此身尊榮瞻地絕感激畏天真
交態遭輕薄浮生有屈伸嗟予意軼軻撫迹獨酸辛
留滯才難盡蒼茫只有神形容真潦倒世業豈沉淪
倚着如秦贅逢迎念席珍壯心久零落敗績自逡巡

載感賈生慟難甘原憲貧邵平元入漢王粲不歸秦
回首軀流落生涯脫要津稻梁求未足台衮更誰親
碧海真難涉蒼鷹愁易馴君能微感激何處不依仁

哭松崗先生

徙舍勞親意擇師得子賢
送游無半載瞻仰似千年
文字雖時樣規模有正傳
門生感知已佇立一潛然

哀徐生

去歲登高句霜楓秋幾多
東籬成惡識西郭動悲歌
天道憐渠在吾文柰尔何
送君紅樹下風葉尚吟哦
生且死求予銘為不朽
計東籬事見擊壤集

烏古論頭之母夫人挽章

冠帔金源舊門闌戚里榮鶴悲人世短銅泣露繁輕
往事驚波去新墳宿草生烏啼原上樹霜月有餘清
侍其提學哀挽

初遠過庭訓擇隣得子賢春風渾一月恩制欲三年
步武思猶在頭顱愧所憐念親侶感舊欲語淚如泉
名鑿張國綱挽卷

良鑿不出戶真隱要逃名宿草今如此春風宛若生
一囊三世藥兩子萬籬金平昔憂多病懷賢倍有情

劉仲文挽章

并序

仲文名郁析州蒲陰人少從事亳府軍
謝病歸杜門不出以春秋左氏學為業
所居里名黃臺因以為號後仕京師為
將仕郎年六十餘侑酌賦詩而終子元
今為太常奉禮郎

楚塞十年後黃臺一室春從軍有何樂學道不知貧
生子為名士居鄉稱善人死生無所恨今古一丘塵
哭張之傑

義許同生死奪君何遽然無人共清夜有泪葬黃泉
苦疾求予禱遺孤託永憐傷心墓頭字旌孝看他年

青
子題其墓道為張孝子墓

哀郭勸農

才命不相偶如君良可嗟
半生在人下一死更天涯
三歲同君里前年過永家
相望已塵迹零落舊烟霞

頤齋張先生挽詩与先奉直府君同任金大

者舊晨星盡公亡益可嗟
先人曾共學釋子與通家
白日明心素青山點鬢華
封龍餘爽氣誰與醉烟霞

靜脩先生文集卷之五

靜脩先生文集卷之六

容城劉因夢吉甫著

七言律詩類

春陰

淡上春雲暖更輕
一身酒力若雲生
無人也咲樂所
使未醉先休氣始平時
雨霑枯或有蘖微風著物不
聞聲人生日用本無事
閒倚西窓候晚晴

秋日有感

自恐規模日感然
每便孤坐靜無邊
仰觀俯察無多地
往古來今共此天
或智或愚能幾里
一鳴一止又

千年南山正在悠然處目送歸鴻手絕絃

多病

多病年來放盡慵一龕堅坐避深冬欲忘言處飲先
醉不得意時山故濃只許國人知我陋見邵子無名公序
妨高論咲吾庸見司馬公庸書序西巖近有仙芝種為謝白
雲著意封

日午

日午雲輕草色蘓出門杖屨自徐徐乾坤俯仰窺難
見花柳青紅盡不如靜處規模惟厭小動時文理却
嫌疎眼前光景無窮態註盡濂溪太極圖

偶成

一語未能分付時難言方信到真知道參天地用何
小心有羲皇生豈遲後世直須要揚子百年即我是
鍾期折花咲對滄浪影不覺東風就手吹

湖上

湖上幽居事小幽臥看書卷坐垂釣晴園閑是長年
國暑簟靜為無熱丘心遠何妨在人境室虛元自有
天游家人大咲詢生理報我西風咫尺秋

十月朔展省後古城有感

手線西風夫弊衣高城烟樹掛斜暉徘徊飛鳥不忍

去蕩漾滄波如欲歸幾為霜來驚露往每因物是見
人非詩書未辨鄉鄰化道德初心恐易違

道士孫伯英容城故居并序

伯英名邦傑世為縣之貴族遺山元公
為作墓銘稱其遊太學所與交皆天下
名士氣甚高見金世已亂天下事無可
為思得肆志方外以耗壯心而老歲月
遂為黃冠師以終葬毫之太清宮側時
年五十一因兒
先君子錄其家世文行之美以示鄉人

今過其居感而賦時

政教才氣敵希夷冠被翻然亦未宜誰辨胡寅論鴻

容見讀史只除坡老識安期見安期可憐喬木空秋

色惟有青山似舊時款傳先賢問遺事故園猿鶴不
勝悲

過鄉縣西方古故居并序

古今大定間人嘗舉進士不第遂歸獨
居一室置琴書其側不妄與人交縣令
佐公服候門亦以遜辭謝遣之有田數
十畝食其所獲如菽熟惟食菽鄉人好

青仙文集 卷之六 三 二百五
事者欲以米易之不聽曰天所食者不可易也監察御史按行郡邑聞其行上之不報其為人蓋亦近於聖學之所謂指史家之所謂獨行者歟
先父母舉以律鄉人之貪鄙者故鄉人至今能道之古死無後其丘壠已為樵牧區今過其居亦莽焉荆棘中矣不覺感歎夫發潛德而紀先賢實後生之責也顧力未能焉姑題詩以記先父之訓云

名姓初聞自過庭山田力食老窮經鄉間月旦歸公論耆宿風流尚典刑感事重吟鳧繹集懷賢誰築聘君亭還家遊子悲千種念舊思親淚最青

登雄州城樓

古戍寒雲接渺茫故鄉遊子動悲涼江山自古有佳客烟雨為誰留大行野色分將愁外綠物華呈出夜來霜海門何處秋聲急極目滄波空夕陽

夢先壠

望望東阡見松桂孤雲為我且踟躕十年一夢等閑過四海此身何處無千丈春暉空寸草萬山明月只

青竹文集 卷之六 一百六十六頁
啼鳥舊家三徑今誰主羨殺河汾有弊廬

宿玉泉村

先父嘗歆
隱于此

恠見清暉逼晚襟
大行眉宇未消沉
徘徊終日不忍
去寂寞高盟如可尋
歎向孤雲間蹤跡
只應老樹記
登臨樓遲零落今
如此淚盡韋齋刻
印心

外家西園李花

無邊晴雪映柴扉
夢裡繁華又一非
人與山丘屬零
落天教草樹記芳菲
每因寒節來相訪
重為餘香不
忍歸里社他年有
成約結庵終擬號
春暉

入山

珠線晴日明亂虫
秋意有先聲屈盤
未轉坡陀
盡蒼翠忽從懷抱
生一徑峯回失南
北兩山雲近異
陰晴天公若會登
臨意可信傷心畫
得成

晚眺

巖姿濃淡似吾詩
雲點青山學鬢絲
老樹遺臺秋最
早夕陽流水鳥偏
遲無人能解此時
意如我曾來前
古誰本為登臨解
陶寫豈知搖落更
堪悲

山中月夕

滿懷幽思自蕭々
况對空山夜正遙
四壁晴秋霜著
色一天明月生潮
歌傳巖谷聲豪宕
酒泛星河影

動搖醉裡似聞猿鶴語百年人境有今朝

惡鳥

山中夜夜聞惡鳥惡鳥聲中似訴渠氣運變遷皆以
類陰陽對待不相無形聲如此誰憐我天地初生已
有予能辨春風長白日願將花柳付提壺

五月二十三日登城樓

獨倚危闌數鬢毛一簾輕燕晚涼高雲移山影亂初
定雨帶風聲來漸衰物外此天才一幙人間何事不
秋毫遠遊未盡平生興幾欲狂歌續楚騷

曉出西塘

塘水隨人緩步行哀湍激石故輕清太行穠秀洗霜
淨全趙規模天鑿成偶為登臨發悲詠忽從毛髮散
秋聲殷動莫盡尊中酒留到青山佳處傾

南樓

登臨秋思動鄉關展盡晴波落照間歎老自非緣白
髮愛閑元不為青山幾經分合世良苦不管興亡天
自閑初擬憑闌浩歌疾壯懷空與白鷗還

良辰

莫遣閑愁負此身鶯花逐月是良辰乾坤痾痒元關
我土木衣冠亦象人大德豈容輕錄怨小疵休廢更

青仙文集 卷之六 三首二
求淳此中空洞渾無物萬紫千紅總屬春

午睡

閑中何事不清妍鳥戀花陰伴晝眠窗外雨晴山有
暈枕邊風息樹無絃面前多放寬平地方寸嚴臨咫
尺天萬古羲皇有餘意不妨分我百來年

新晴

小雨新晴草色蘇家園生理未全踈埋盆欲學魚千
里試地先栽芋一區時與老農談稼穡不因閑客罷
琴書乾坤妙處無人會臥看墻陰雀哺雛

野亭會飲三首

列坐平分草色勻四圍天設翠屏新不可一日無此
客安得四時長是春野鶴自成難進狀江鷗不作近
前嗔鳥聲自向花枝說好箇羲皇世上人

曳杖蕭然一幅巾山夫野老解相親橫身物內誰為
我賦象天中彼亦人細數平生無此會不來一醉負
今春舉杯自壽復自咲輕烟霞吾豈貧

行樂人生當及辰今朝光景為誰新林陰薄々微露
日花氣溶々暖著人春色十分看欲盡鳥聲千種聽
難真東風就手吹殘酒無限青山動翠鱗

淺酌

青竹文集 卷之六 三百四十一
淺酌微吟意自真新詩改罷酒微醺
流鶯暗逐春光老獨鶴潛驚夜景分
共見白駒如晚景豈知蒼狗是浮雲
無邊風月誰無分只恐靈臺未屬君

夢鎮州潭園先父舊隱

昨夜分明是鎮州溪潭先子舊曾遊
魂來千里太行碧夢覺滿庭烟水秋
古淡園林無限意登臨今昔幾人愁
當年猿鶴應無恙爭信書郎謾白頭

過鎮州

太行迎馬鬱蒼々兩岸灘聲帶夕陽
霜與秋容增古淡樹因煙景恣微茫
閱人歲月真無謂得意江山差

自強曾記城南舊時踏十年回首儘堪傷

井陘淮陰侯廟二首

飢僮羸馬倦重游萬將分兵坐此籌
城項豈知秦尚在奪齊便覺漢無憂
英彭一體誰遺類絳灌諸孫自列侯
夢敘鹿泉々下水亂山百折只東流
許身良犬笑君癡快々難勝已自危
智數相催難免死才名如此豈無疑
兩年蕃鎮真猶做十載君臣喜又悲
最恨當時蕭相國直教三族到全夷

讀漢高帝紀

禮樂經秦掃地空遺民洗眼續王風
規模自襲挾書

律舉措惟推約法功魯國兩生心獨遠新城三老義
誰同只知才到蕭曹盡可信高皇是沛公

易臺

望中孤鳥入消沉雲帶離愁結暮陰萬國山河有燕
趙百年風氣尚遼金物華暗與秋容老杯酒不隨人
意淚無限霜松動巖壑天教搖落助清吟

秋夕大風有感

坤輿聞說若行舟乘此真堪萬里游大塊氣豪知寡
和黃紬坐穩覺無求窓間小草根自賀雲外高松聲
亦愁明日西山想清度天教老眼看晴秋

盆池

自慚眼孔一盆多柰此無邊風月何莫道渾非九雲
夢不妨能著百東坡斡旋在手天隨轉虛靜如心景
自過誰弄扁舟詫吳越為言吾老怯風波

水燈

南湖新綠破春容一炬才分萬炬同共說金膏能有
景豈知陰火解生紅魚龍水樂三更後星漢仙槎一
色中喚起東坡看清曉向來碧海又青銅

方鏡

當年玉斧落何方陰魄誰教擬太陽翻起坤輿看鰲

背借來心境發天藏衣冠嚴肅知無愧肝膽輪囷覺
有芒四海紅塵競白日託身分我鏡中涼

西窓

洛水秦山夢寐前風流陳邵兩矐仙中峯太華五千
仞皇極一元十萬年廝役閱來歸舊隱迷歲畫出稱
高眠人間此意今誰會卧看西窓生暮烟

有懷

飄飄遺世覺身輕尚友千年凜若生瑞日祥雲程伯
子冰壺秋月季延平浮沉滄海人事換晴雪大行眉
宇清曳杖歸來北窓下一尊濁酒為誰傾

記夢并序

至元戊寅十一月二十四日夢十餘老
翁衣冠甚偉以章疏薦予章中署予為
金文山人而見稱之語甚多既覺惟記
松栢歲寒桑榆晚景之句而每句之下
又各忘其六字遂以詩記之

夢中說夢已成癡更擬從翁問所疑松栢歲寒應有
謂桑榆晚景歆何為名書冊闕非吾望家在金文不
自知果有仙山隔塵土先生亦歆住仇池

捲簾

青竹文集 卷之六 二百五
捲簾雲樹散微明淡似幽人百慮輕真宰鏤雕亦良
苦洪鑪消鑠似無情空巖月出人境失灑露秋巖山
氣生欲寫天機誰領會西風吹在棹歌聲

偶作

為貪風月重登臨感慨幽懷不易禁靜裡形神君與
我眼中興廢古猶今區區此世真何物落落平生只
寸心聞道江湖好烟水飛鴻滅沉有遺音

高亭

高亭雲錦遶清流便是吾家太一舟山影酒搖千疊
翠雨聲窓納一天秋襟懷洒落景長勝雲影空明天

共游咲向白鷗問塵世幾人曾信有滄洲

放歌

未須鵬翼賦垂雲老眼冰壺亦自新碧落銀河見高
舉紅塵白日屬何人纍仁坐閱秋風客擾仁空悲地
上臣左挽浮丘一杯酒吾言誇矣不須嗔

自遣

久矣黃塵絕往還惟餘風月到柴關清霜烈日從渠
畏野鶴孤雲適自閑天上銀河連碧落人間秋色對
南山高吟大醉堯夫老只有豪誇不易刪

老岸

青休文集 卷之六 一百九十九頁
老岸陰陰雲樹清柴門寂寂綠苔生空明萬象隨月
出水墨四山因雨成千古心期破茅屋百年人事短
燈繁道人不是悲秋客聽盡踈蛩夜夜聲

世上

世上悠悠儘自爭眼中隱隱放教平飛蠅觸鼻人爭
怒落葉臨頭我謾驚既有陽秋暗消長何須青白太
分明蒺藜原上清霜重辛苦十年跌足行

幾葉

幾葉踈桐萬斛秋四山清露一窓幽人能知足隨處
樂心若忘機百慮休事物閱來如有悟囊箱空慣已

無羞醉中曾聽家人語老子年來不解愁

萬古

萬古遺編未寂寥一窓風露晚蕭騷有時陶令羲皇
上何物元龍湖海豪鼯鼠千鈞宜自惜蟾蜍寸鐵亦
徒勞年來點檢人間事問舍求田計最高

老大

老大情懷隨處樂幽閑氣味逐時添平生長物不入
室一日百錢輒下簾題品雲山寧有諱收羅風月不
妨廉客來恐說閑興廢茶罷呼棋信手拈

山石

山石那容玉獨堅人生磨滅殆天憐盡蛇最戒足無
用書馬常憂尾不全誰見虎鬚真可將自慚雞肋豈
勝拳誤人莫向婁師德不領春生未唾前

人生

人生底用廢閑思物理通來盡我師凍雀猶能樂生
處秋花元不厭開時齊姜必娶終無偶秦越未生寧
乏醫若道終安須待足百年何日可伸眉

夏日即事

迂踈爭咲近清狂多病筋骸可預防久乏園蔬因種
藥不留窓紙為抄方閑從鳥雀分晴晝靜與蛩蟹共

晚涼莫道幽人好標致北窓自古有羲皇

冬日

砂瓶豆粥土床烟中有幽人意漫然元晦居山豈懷
土仲尼微服即知天閑中作計飽為上書外論文睡
最賢小子應門當拜客病夫便靜乞相憐

午窓

終歲柴荆掩寂寥物情多忌恐難逃家居閑白惟求
省應物寒温亦憚勞陳瓘只知炊餅大元龍新厭卧
床高午窓葉乱風成陣病擁紉衾氣尚豪

馬酒

漢家桐馬豈無傳力盡皮囊味始全
曾次沃焦常八九眼中駭牝少三千
百杯雖有冲駒氣一幕何分救
勒天彼酪猶能奴命茗南風到此便凄然

平昔

平昔襟期鏡屢看而今涉世願高年
自憐不唾青城地共咲仍憂杞國天
履影無傷猶不忍吹齏雖誤亦當然
人間萬事思空遍依舊西窓理斷編

冬日

迂踈懶散百無能半似田翁半似僧
製藥就圍煨芋火檢方聊趁剝麻燈
自知裘爽今無復共道癡頑舊

不曾閑倚南窓貪覓蟲敲門人恠不時應

次人韻

樂天方識淡中甜安土無妨著處粘
道在市朝皆可隱機忘鷗鳥亦無嫌
惚虛不礙山雲度樹老慣經秋氣嚴
世上閑愁渾幾許而今青鏡滿霜髯

中秋

天借無雲兩借青月邊涼露滴無聲
只知老子興不淺誰信太虛白亦生
四海唯當共人影寸心直擬配高明
中二句夢乾坤元有冰壺在回首紅塵意未平

人情

人情雲雨九疑山世露風濤八節灘共說長安如日
近豈知蜀道比天難浮航莫嘆腰舟渡坎井終當擊
木觀會取登高有良法此身何地不平寬温公曰登
高有法徐

有客

門前有客通名姓一別十年記憶無鬚髮俱驚各衰
白行藏已涉幾榮枯急呼滿酌辭醅軟即用親嘗補
飯簾溪盛故來兼久候送歸雖病不須扶

夜雨

夢幾呼童問幾更未應先作不平鳴山溪六月有秋
意夜靜滿城惟雨聲四海虛鳴此身愧百年浮世寸

心驚誰教簷溜如愁思歎斷還連直到明

現前

萬事除無取現前此身隨處可周旋居南懷北豈安
土已夏願春非樂天誰謂色涵心有外我知彌滿道
無偏洞觀今古平平在賸盡區々智與權

上塚

鄉鄰見戲說兒童日日相邀社酒同故國無家仍是
客病軀未老錯呼翁里胥驗帖徵游戶縣長聞名謁
下風欲向溪南訪喬木不禁烟雨正空濛

桃花菊

東籬元不是天台誰挽春風到酒杯
丹藥有靈能換種黃花從此不須開
已經晚節霜才識不是寒香蝶亦猜
老眼淵明不今古幾回春去復秋來

夏日幽居

隱几南山意獨長
回看塵世易炎涼
栽培得力江陵橘
薄惡傷心陸氏莊
莫就一時論絳灌
要從千載到羲皇
人間何處菟裘好
擬問希夷買睡鄉
閉門終歲淡無求
雲雨人情亦可憂
斗酒難酬滿車望
杯羹直結殺身愁
平生幾兩謾多苦
一日百錢姑少休
山鳥不鳴林影靜
臥看蛛網掛蜉蝣

夏日飲山亭

借住郊園舊有緣
綠陰清晝靜中便
空釣意釣魚亦樂
高枕臥游山自前
露引松香來酒盞
雨催花氣潤吟牋
人來每問農桑事
攷證床頭種樹篇

晨坐

共笑龕中坐已癡
環堂燈火誦聲遲
人才興替世所係
瓶水溫涼天可知
差律每因夕病後
一寒偏怯歎明時
三年馬隊成何事
採菊南山舊有期

與客會飲野亭

遙岑一碧淡相依
野態行雲共意遲
多病留侯寧復

青竹文集 卷之六 一百七字文刊
偉長身諸葛但如癡相思千里尊酒盡永嘯一聲小
鳥悲風袖翩上似何處青林西北雨來時

過徐橋

老岸石欄曙色分只疑身是入山雲十年往事不
回顧百里清泉如可聞人世誰教有長跖坤靈終亦化
塵氛興亡更遣陂塘在幾欲悲譎酒來醺

白溝

寶符藏山自可攻兒孫誰是出群雄幽奠不照中天
月豐沛空歌海內風趙普元無四方志澶淵堪笑百
年功白溝移向江淮去止罪宣和恐未公

過東安趙宋先塋

五季風煙慘畫纛渠兒有志亦雄哉累朝禪策皆虛
器千古黃袍又厲階文物漢唐今已盡史編南北更
堪哀荒墳一品知何處猶遺石麟草半埋

過東安

干戈天亦厭紛上豪聖千年共幾君太祖無心亦徒
說吾兒有志更誰云悲歌莫管千秋後王氣應無一
品墳今古區々等如此五陵哀鴈入秋雲

登武遂城

神州英氣鬱高寒臂斷爭教不再連千古傷心有開

青竹文集 卷之六 十一
運幾人臨死問幽燕平生臥榻今如此百萬私錢亦
可憐咫尺白溝已南北區々銅馬為誰堅

登中山城

黃金一夕冷如鎖劉項蕭然恐未真世事惡盈應有
數天心機亂豈無人陵遷谷變橫流地卵覆巢傾死
節臣毛髮諸孫生氣在九原精爽凜猶新子曾伯祖
奉議府君貞祐初死節中山而奉族沒焉

望易京

亂山西下鬱岩堯還我燕南避世謠天作高秋何索
漠雲生故壘自飄蕭誰教神器歸群盜只見今人泣

本朝莫怪風雷有餘怒田疇英烈未全消

七月九日往雄州

秋聲浩蕩動晴雲感慨悲歌氣尚存洒落規模餘顯
德承平文物記金源生存華屋今焦土忠孝遺風自
一門白髮相逢幾人在蒼煙喬木易黃昏

武陽故臺

仁義徒令此舌存轍環初不抹紛々天公欲為秦漢
計野色更無燕趙分滿眼兵塵餘故壘一聲樵唱入
秋雲擬乘碣石觀滄海易水東流去不聞

鄉先生漢韓太傅嬰墓

章句區々老益堅百年軻死已無傳四詩今併毛公
廢三策聊存董相賢祀典曾聞鄉社在荒墳重為里
人憐絃歌燕趙今誰見高咏周南獨慨然

定興文廟枯杏復花其尹求詩縣吾奉議府

君故治

手澤天教檜葉存窮鄉枯朽亦霑恩敢將吾道論榮
悴且喜甘棠見子孫但使儒林有根柢會看寒谷變
春溫題詩當作諸公唱百里東州又故園

宿華陽臺

石徑盤々擁亂霞雲間雞犬是誰家空山月出人境

失高樹露涼秋氣加蜀道青天休種杞武陵流水漫
尋花太行東北三千里盡借晴嵐染鬢華

又

夙志經綸尚未乖消人閑去只蓬萊龍門正要書堂
在天柱誰分戶帖來雲外久遲黃鶴至夢中曾採紫
芝回秋風何日飛來得重免移家載酒醅

飲聞雞臺

出門人事厭紛紛春色三分已二分十步離山九回
顧一杯到手百無聞蒼茫天地有如此磊落古今何
獨君欲向荒臺問遺跡水明沙浦只行雲

宿鄉僧致公房

倦客歸來借夕眠，偶因相敬識君賢。
常勤有酒邀陶令，每愧無衣謝太巔。
謂暢墨名聊汎應，論周陰助豈誠然。
平生親切冠巾語，欲撲還休亦可憐。

九日晦日過鎮州宿趙徵士皇極道庵

慘酷姦訛禍世親，翁張那復見真淳。
歲來龜六終留殼，調中狙三已自塵。
符藥真能度衰俗，樵漁却恐有幽人。
摩挲石刻皆名筆，庭下寒花不似春。
庵取象龜藏六

宿趙山人房有懷

書劔南游氣吐蜺，歸來華髮首難低。
江山應識千年鶴，豪傑空慚半夜雞。
物外有天藏太古，人間無地種丹萸。
相思日暮一杯酒，望斷碧雲何處棲。

宿龍宮

擬欲題詩贈白雲，且傾濁酒洗塵氛。
閑將談笑論當世，卻喜稱呼是隱君。
天柱舊曾分戶帖，神林今又有移文。
夜深汲長鉢，悲歌罷此曲山靈恐未聞。

玉乳峯

亂山如擁欲爭先，惟許孤峯入馬鞭。
舊見劔光曾犯斗，誰教箭苦亦通天。
只應絕頂千年石，中有齊州九

點煙安得凌風乘此去東游滄海看桑田

洪元宮 明日擬到天城

樹邊平野接晴霞
脚底清江走白沙
方外道人留客
住門前塵世情
山遮自慚爛賞
無多暇更有行窩
第
二家煙雨兩坡皆
古木興來便作上天槎

唐張忠孝山亭故基

斷碑藩鎮記當時
杯酒談兵少牧之
山色何曾間今
昔人才初不限
華夷水波風起心
猶壯木杪秋生鬢
已知莫更候雲臺
上望武陽禾黍亦
頽仁

雙清空堂遺址

心遠由來地自偏
若分心跡已非賢
結廬人境元無
害跨鶴揚州更兩
全石頂經龕有隨
處山中學館竟
何年馬頭果要為
初祖擬問西巖借
一廬

張氏西園

水府生煙晚更蒼
翠陰含雨暗生涼
人間豈有赤松
子天上應無綠野
堂一日平原驚客
散千年郭隗又
臺荒誰教老樹夕
陽在留與憑欄遣
興長

賈氏溪堂

澹上春波遠更宜
丘山華屋搃成非
來今往古年華
在厚地高天人力
微世上紅塵無此
客杯中明月有

清輝燕南盛事君須記曾為東湖盡醉歸

憇謁山寺

石田霜落晚蕭騷一徑禪扃亦自高九萬里風安稅
駕二千世界等秋毫山哀自昔天相罩秋老不禁詩
太豪西望雙龍有高隱結庵終擬近林臯

會飲北山

相逢相飲莫相違往事紛々何足悲別後幾經滄海
淺歸來豈止昔人非此山變滅終如我後會登臨知
與誰今古區々等如此不須辛苦嘆斜暉

暮春山游

萬山傍遶翠爭新兩澗平分月有鄰木杪柴關如看
盡松陰苔徑欲凝塵浮雲柳絮人間世流水桃花物
外春杯酒狂歌極浩蕩野煙晴樹望中勻

春日游山

川氣迎晴澹沍春泉聲招客浩如神隨時俯仰有魚
鳥乘興往來無主賓碧水白鷗心共往浮雲蒼狗態
誰真平生經濟程夫子年少看山意已親不是吾儒
未經濟等閑爭肯出山來明道少作也

西山雅會

山色舊無今日濃雅期新得與君同曾懷霽月千年

後尊酒春風一月中
靜裏乾坤無彼此
眼中花柳各青紅
高情久已忘琴了
誰管殘陽送去鴻

水北道館

會從氣朗看春朝
始信蘭亭水石遙
物外壺公能避世
山中巢父不知堯
波間明月隨吾取
松上白雲如見招
曉策重來有成約
無妨談易對漁樵

有懷

百年身世付秋毫
萬里雲霄有羽毛
樓上詩成山欲動
眼中人去氣誰豪
崔嵬自可兄呼石
憔悴直須僕命騷
尊酒論文復何日
西風迢迢暮鴻高

九日客至

有人車馬訪柴桑
怪見寒花滿意黃
莫對西山談世事
試將華髮照滄浪
淵明不與白蓮社
程子猶憐綠野堂
他日燕南話耆舊
此回風味亦難忘

除夕

莫道春風室罄懸
試看孤影伴頽然
浮雲往事空千變
清鏡明朝又一年
頭上無繩繫白日
胸中有石補青天
幾時能了西山約
六角黃牛二頃田

秋夜

已喜山溪稱野情
每慚無物慰諸生
人貪日課不時

睡雞為誦音長早鳴病後端居信張詠靜中未發有
延平誰知今日絕絃意卻恐人間知此聲

又

坐困沉思強起行虛庭涼露下無聲為尔寂上人莫
咲不肯碌上君何成萬古興亡天亦老百年身世夜
難明情知不為學仙去也歌蓬瀛寄此生

新曆

山家曆日年上
有林鳥園花報四時
建成預求尋藥
月逢辰要及種瓜
期曾中堯典二三
冊夢裏幽風第一
詩餘韻千年宛如
在晴窓捲卷不勝
悲

偶成

自覺筋骸老漸頑
曾經堅脊度危關
清霜烈日留身
後秀氣春風滿座間
後有頽波知底柱
莫教秋色避
南山雲鵬稅駕今
無地羨殺江鷗儘
日閑

放詩

莫道人生能幾何
金銀官闕亦無多
垂楊流水輕風
裏碧落銀河暮雨
過天地此身真逆
旅雲山到處是
行窩九原喚起堯
天老我舉一杯君
試歌

野興

得意江山入酒尊
乾坤英氣未沉淪
莫思世事兼身

事不薄今人夢古人明月清風無盡歲野巷啼鳥一
般春客來惟說烟霞好只恐先生醉後嗔

秋郊

行過青林徑欲還誰家茅屋在林間雲初湧出半含
雨風漸吹開微露山世味嘗來知懶貴物華老盡覺
秋閑天教勝境為詩敵未許幽人穩閉關

西湖

水竇浚歲十畝煙賣書真欲買魚舡數椽破屋已自
足四海虛名良可憐醉後不知清露下興來擬共白
鷗眠瀟溪謾有當年志老去而今只愛蓮

對菊

迂疎不辦一身謀鬢髮空添四海憂畫本流民今復
見詩家逃屋為誰留黃茅安得千間厦白布空歌萬
里裘政有南風曲中意可能獨醉菊花秋

憫旱

農父看雲淚亦乾靈秋誰信欲生煙萬金良藥汗猶
出一寸丹心天可旋未便無滄思樂土不禁憂國願
豐年為瞻河漢中宵起獨對殘燈理斷編

城樓待雨

雨入江樓勢欲吞雷轟何止語難聞未憂彼岸將為

壑只恐吾山盡化雲風伯為誰能卻敵物華依舊嘆
如焚百年人事今如此猛拍闌干怨夕曛

溪光亭看雨

萬山齊擁白煙來木杪先聲失怒雷海岳奔崩換毛
骨乾坤牧歛入胞胎龍公所蘊有如此塵世一清何
壯哉坐看神功空束手夕陽華髮對蒼苔

積雨

萬象何為入杳冥懸知物外自高明前年憂旱有今
歲半月閉門如一坐捧日謾勞中夜夢補天誰識寸
心誠陰雲政使高千丈坐愛魚頭恐未平

秋霖

春旱泥倉恐謾傳誰從得雨得豐年麻衣有垢供秋
藪土銼無文換曉煙果為松薪禁明月真教斥鹵變
桑田胸中幾許晴霓在四海霖霖獨慨然

次韻閔雨

已酉豐凶不偶然今年千里土生煙夢游樂國每嫌
覺見仙雲猶酷憐畢竟蛟龍思得雨何勞蟻虱謾
呼天山人萬慮消磨盡惟有憂農阻靜便

癸酉大雨次人韻

黑風吹海入天瓢誰信銀河直下潮渾沌只疑還太

青作文集 卷之六 二十六 三百十三
古規模應欲渡唐堯衣冠半夜方孤坐塵溷千年共
一漂且喜開簾見白日不須隴畝問秋苗

海南鳥

越鳥群飛翔漠濱氣機千古見真純紇子風景今如
此故國園林六暮春精衛有情啣太華杜鵑無血到
天津聲上解墮金銅淚未信吳兒是木人

白海青一名玉爪駿

扶餘玉爪舊曾聞青鳥猶霑海氣昏掌上風標有如
此眼中神駿更怜君羊無未洒頭驚血春水誰開獵
騎門過鴈昏鴉莫回首霜拳高興在空雲

爆栗

山家愛客夜留連奮發驚聞一栗先鑿竅誰言無渾
沌弄丸金喜得天全香甘合用金甌選冷淡那容玉
版禪回首燕秦幾陵谷眼中繁富竟何年近世山家
避粟稅往上伐去

醉梨

白雪春香洗未殘玄霜誰遣凍成團凍封圓顆盤增
滑蜜和濃漿齒避寒綠塚從今忘病渴金花無地着
餘酸快人風味依然在莫作尋常軟熟看

飲江漢白

青竹之集 卷之六 二十七 二百九十二
高亭飲興動江山為捲灘聲入座間糟麴真能釀滄
海魚龍直恐盡神奸襄流謾說葡萄暖仙國曾分玉
液慳聞道兵塵埋楚甸一杯誰與洗愁顏

薔薇酒

顏色醱醱茉莉香琉璃到手會須嘗一杯滄海泡成
幻萬古蒼菴醉有鄉涼冷併收天水碧輕浮猶帶女
真黃錦囊盡貯春風在別是仙家不老方 服食家有
餌薔薇法

黃精地黃合釀甚佳名以地仙酒

僊家名品對差我誰信幽人用物多酒面白雲招我

在杯中華髮柰君何西山秀氣斲欲盡易水寒聲釀
亦和未望天行至千歲舉觴當和紫陽歌雲卧天行
非予敢諫宁一處和千二百歲晦翁調息歲也

玉柱雙清香

二氣元從太極分浮雲起滅見來真白虹貫日豪華
散底柱中流意象新方寸有靈涵大塊頭顱無物隔
蒼旻籃田萬頃煙生玉未辨晴窓半穗春 心無外体
無間吾薰爐銘也

玉簪

花中冰雪避秋陽月底陰上鎖暗香玉瘦每憂和露

滴心清惟恨有絲長且留宛轉圍沉水莫遣聯翩入
粉囊只許幽人太相似蒼苔踈雨北窓涼

反垂柳短吟

偃蹇高松雪謾飛宸冷憔悴綠楊枝青絲曾識鶯聲
軟黃葉俄驚馬足遲有分只偷春色早無心要結歲
寒知不應再得東風力更與行人管別頭

次韻劉尚書尊號禮成

萬姓瞻天仰泰階老人星現五雲開混同直擬千年
論積累無從百世來含哺豈能遮帝力有根無不待
春雷舉頭日近長安遠葵藿傾心即壽杯

答或者以所注孫子見示二首

學術兵農豈盡無規模如此六區七權書不免增多
口霸論誰教混一塗親手中韓如果有許身管樂未
全誣千秋萬古中庸在留與橫渠佐後圖邵公武讀
書志有橫渠少年註尉繚子一卷

誰遣歐陽筆有神微詞端不赦堯臣樵夫見笑寧無
媿童子羞稱亦可人但得躬畊全性命猶勝偏霸在
風塵芻蕘一語宜溪聽樓上元龍且莫嗔

次韻答范陽郭生

默坐誰窺樂境沒無絃初不用知音曲肱睡起亦何

青竹文集 卷之六 二十九 二百四十五
事弄月歸來造自吟多媿寄書勤訪道未嫌傾蓋即
論心西山百里平如按欵認東州煙雨侵

次韻答趙君玉

萬古西山翠不休一菴今在白雲頭
開軒招月淡相對倚杖聽泉清可收
已喜陵空有高興豈知卧病阻同游
南湖燈火十年夢舊好何時得重脩
來詩有千崑万壑春風動安得陵空訪
靜脩之句故及之

傳彥和壽子詩以韻答

避世今成癖立山傷時上復井生瀾
希夷老不留張詠康節初曾咲謝安
歲月妬人雙鬢老江山分我一

杯歡因君喚起扁舟興擬畫臨流白帽間

次韻答王之才見寄

蕭蕭霜葉打窓疎耿耿寒燈伴獨居
鄉謔謾評康節僻後賢方識子雲書
詩成已破三緘戒臂穩因思九折初
明日相望在何處青山佳處即吾廬

次韻答張夢符

癯然一榻卧成痕多病人疎自古云
執別二年猶念我開緘千里若逢君
家聲舊仰遼東鶴才望今稱冀北群
每憶琴尊前日雅幾回搔首賦停雲

寄張之傑

便擬庭闈捧檄過直須隨俗苦揚波一瓢有樂誰云
細三釜無歡亦謾多戰國遺風餘管樂南朝清議尚
王何見人時樣知吾拙獨誦滄浪太古歌

寄彥通

青芻白飯思悠然燈火山亭暮雨前不意相思渾百
里直教一別動經年又甘分席樵夫下敢望過門長
者先自足煙霞愛招客可無佳句助清妍

示彩鱗

相思擬話百年情燈火直須幾徹明繼志未論班氏
史隆師何用鄭公名人間忠孝寧無責學術淵源先

有盟欲寄君詩仍感泣野夫能有幾門生

示有寄

南鄰新膾北鄰醅莫忘蓮湖舊釣臺根底自宜留故
土焰中真見有寒灰短長無就相形看消息當從既
往推遙想西城共登睡水光山色亦悠哉

付阿山誦

十畝荒田不自耕半空樓觀幾時成人因遇困方言
命我為求竒反喪名此去要知灯是火向來空指鴈
為羨新詩銘在山童口百過高歌告乃兄

送董巨濟尋親

蒼繞東鄰竹馬鞭春隨西舍板輿肩白雲尚在棲遲
地綵服俄驚喜懼年樵爨定知生處樂兒孫多向老
來怜阿翁別後還家夢比擬思親恐未偏

送人官浙西

江海十年幾戰酣劫灰飛盡到畊蠶亂離文物想猶
在凋弊徵科恐未堪眼底興亡即今古胷中形勝欠
東南因君漸有扁舟興佇待清風洗瘴嵐

送人官吳中

天徹藩籬要混通古來佳麗數吳中送君如對秋風
起恨我不隨江水東五瘴可妨鄉土異孤雲須念母

心同畫畝留取風烟看莫趁并刀一剪空

張仲賢宣慰淮東過余山中臨別贈詩庸見

定交之意云

昨夜相逢終夕話今朝送別百年情世緣盡付禪心
在官况併隨詩境清此日林焚猶有望他年勇退豈
無盟知君苦愛希夷老莫厭山溪不寄聲

郭太守提舉松江

蔡公聲望動江東應識頭顱尚外翁陵谷初經新化
日導鱸不似舊秋風看雲正要忘憂計避瘴無如寡
欲功萬里吳松憑寄語并刀明日試胷中

贈韓道人

積學輸君氣稟真胸中駕賦自陵雲靈砂換骨知何
物道籙降心亦謾云銅注露繁經幾見鶴言華表竟
誰聞風流大父承平事賴有當年李少君韓及識余
先大父今百三歲矣

贈司馬道士

仙界清涼亦陸沉風流儒素渺難尋白雲自解留住佳
客青帔端能爍壯心知己未論鴛鳥賦移人先聽水
仙琴野夫近有南來興乞我庵前十畝陰司馬氏陵
川名家陵此或謂清涼境界

贈趙丈八十詩并叙

趙文字澤民金義宗初年應科中天津
下第一授商州知法尋除左部檢法迂
新息令北渡客順天中統初擢為左三
部司正致仕景州判官為人樂易寡默
嘗與先人同應真定宣撫司辟召故予
以父執事之今年八十餘里人好事者
榮其壽諸公為賦詩而求余倡焉

律學專門自可疑更從報施論心期干戈留在三章
法松菊歸來兩鬢絲再世通家惟此老百年涉世亦

青
吾師平生辨作者英序慚媿胸中壽域碑

都山劉文九十詩卷

感事還悲負米身此生無復九齡親干戈誰共知年
喜天地猶全愛日真只擬商顏亦秦土豈期唐水尚
堯民胸中壽域平生開卷題詩覺有神

訾相士詩卷

形聲感物即天成善惡因心有相生人事百年隨反
覆天容一日幾陰暗僕夫茗椀何妨共斷役王門未
可輕不向訾家洲上醉胸中風鑒恐難平

題贈却道人詩卷

開卷烟霞着莫人紫芝瑤草憶芳尊法筵古禮存三
代野服遺風見一痕唐水堯山猶樂國葛洪張果有
仙村何時輦母東隣了老婦烹茶自應門

渡白溝

薊門霜落水天愁匹馬衝寒渡白溝燕趙山河分上
鎮遼金風物異中州黃雲古戍孤城晚落日西風一
鴈秋四海知名半凋落天涯孤劍獨誰授

遂城道中

鐵城秋色接西垣遠客還鄉易斷魂霸業可憐燕太
子戰樓誰吊漢公孫冷烟衰草千家塚流水斜陽一

點村慰眼西風猶有物太行依舊壓中原

鎮州望抱犢山

亂山西去獨崢嶸合在仙經第幾名物外高閑真有意亂來險固亦堪驚太行穠秀霜洗盡全趙規模天鑿成珍重幽人留顧盼封龍英爽未全平

避暑玉溪山

風露撩人儘力清也應知豕到禪高秋聲滿谷有生氣山意帶烟成遠形皎月欲升天失色白雲初出樹留青佗年若訪經行處合有先生避暑亭

溪光亭小憩

尋涼隨水到溪亭十里綠陰慙鳥聲自惜形骸恒世故豈知風露已秋清白雲似與山爭秀落日放教川盡平六月農家獨赤地登臨舒嘯若為情

留題山房

靈風縹緲竹蒼飛怪石參差樹影齊壺裏有天藏日月杯中無海飲虹蜺松生太古鶴應識踏入白雲山盡低萬里黃雲一回首微茫烟水意棲迷

水門庵

池烟林影淡無姿物外高寒兩石磯雲外流行寧有跡乾坤俯仰自相依波涵晴景動猶靜鳥戀幽人去

青
復歸回首塵緣吾未了靈風且莫故吹衣

井陘淮陰侯廟

君臣尚詐日生疑誰與乾坤息戰輦未論恃功羞伍
噲試看觀變要王齊良能用漢氣無敵蕭可制韓才
自位枉為虛名誤忠節五陵烟樹亦淒迷

登高有感

踈烟晴曉散輕寒秋色滿林霜意閑今古消沈絕白
日乾坤洒落一青山半生心苦頭先老兩姊墳荒淚
未還瞬息西風解十里登高聊為送餘潛

樓上

樓觀參差接大荒五雲分我白雲鄉卧之地
上太行小來自帝傍春夢長灑露明河氣蕭瑟黃塵落日烟
蒼茫清風簾外問何客玄鶴飛鳴天一方

春游

巧穩林亭無四鄰背山向水得天真風光正及二三
月童子同來六七人十日得閑須小醉一年最好是
溪春鳥聲似向蒼枝說曾見無懷有此民

新秋

俗物何曾擾病懷憐渠孤憤若為開人生如此亦安
用野鶴翩然去不回萬古青天留月在絕聲白鴈送

秋來西城無限峯巒好擬對一峯傾一杯

秋夕

西風吹掩讀殘書慨想平生時自呼度日悠々良可惜軒天磊々未應無才名莫要驚人甚覈論終當與禍俱長嘯一聲秋意滿無邊霜葉下庭蕪

夜坐有懷寄故人

幾葉疎桐萬斛秋四山清露一窓幽高情千古謝安石壯志平生馬少游有錯真成六州鉄欲還空說大刀頭悠々且付天公在未必蒼生待尔憂

秋望

六從朝雨霽來寬日到平蕪盡處還嘆老自非緣白髮愛聞元不為青山洛陽懷古真豪聖李白學仙亦強顏何處蓮々有仙掌不妨招永暮雲間

秋日有感

自覺規模日感然初心道德負中年仰觀俯察無多地往古來今共此天出處不論三代後刪脩直援六經前南山正在忘言處目送歸鴻手絕絃

癡坐

野人癡坐靜無邊愚昇從渠兒戲然或智或愚能幾里一鳴一止又千年俗流在眼何妨病細故經心信

青竹文集 卷之六 十七 三百二
未賢究竟誰能離此世孤山絕頂送華巔

盆池

青蛙昨夜聖來鳴斗水那容掉尾鯨白髮驚魚應百
豕扁舟捉月記三生荷風扶面秋先覺苔露生波晚
更清我欲江東鑑湖老天河早為洗南兵

虎甲

氣勢江淮一旦空故教金甲虎生風崢嶸鉄騎千夫
勇凜列寒威百獸雄不信豺貅禦萬竄豈知狐兔動
幽叢聖朝千古征南錄亦有孫君治造功

黑馬酒

仙酪誰誇有太玄漢家桐馬亦空傳香來乳面人如
醉力盡皮囊味始全千尺銀駝開曉宴一杯瑤露洒
秋天山中喚起陶弘景轟飲高歌救勒川

賦孫仲誠席上四杯仲誠舍題彥通舉韻

隴鳥回頭意若何剗賜欲永鑑紅螺微茫山意詩痕
在灑灑江聲飲興多聖處已分糟與蠓醉來唯見酒
成波千年醒殺江魚腹應恨生身在汨羅一任注瓦
傾銀竟若何紅珠元稱捲金螺微茫山意詩痕在灑
灑江聲飲興多聖處已分糟與蠓醉來微見酒成波
千年醒殺魚蝦腹且莫乘流問汨羅

右螺

碧筩和露捲晴霞錦浪隨鯨落晚沙風趁歌聲來弄
葉酒知人意要浮蒼曾中壁立三峯玉醉裏神游太
一家明日清霜看紅翠人生容易鬢成華一作江鄉
雲錦爛晴霞海浪鯨魚落晚沙烟影橫橋淡留月露
香芳酒淺浮蒼風流玉井三峯夢浩蕩蓮舟太一家
明日秋霜減紅翠人生休遣鬢成華

右荷

希夷尊俎永相望混沌鑿開見此觴金橘有天容逸
老青田無地避餘香雲中招隱留仙掌物外尋真得

醉鄉試向峩嶠問啼鳥人間紅雨幾斜陽一作希夷
尊俎永相望混沌鑿開見此觴霜橘有天容逸老金
橙無地避餘香人間玉母留仙種物外秦人有醉鄉
試看累上峩下塚莫教紅雨怨斜陽

右槭後蜀紀劉先祚進槭核杯云滄之華山
陳搏邵康節謝人惠希夷尊詩有仙掌峯岫
峭不收希夷去後遂無儔能斟時事高擡手
尊酌人情略撥頭之句

瀟湘千樹暮林平風露詩腸快一傾蜜戀金絲仍可
意香分綠蟻最閑情洞庭春色元無恙南國幽姿謾

青竹文集
濁清誰辨酒缸千萬斛棹歌和月捲江聲一任瀟湘
千樹暮雲平風露詩腸快一傾蜜戀金絲仍可意香
尋翠袖亦多情江陵春色元無恙楚澤幽蘭恐未清
惟有酒船三萬斛南飛齊和凱歌聲

右橙

刪錄以韻即席課諸生東齋諸物七首

遠山筆架痕字

何物能支筆萬鈞按頭依約遠山痕燈橫煙影隱猶
見秋入霜毫勢欲吞掌上三峯看大華人間一髮是
中原中書未免從高閣不向林泉怨少恩

折疊簡牌筠字

誰將霜縹添霜筠幾葉齊分楚夾勻眼應有無真亦
偽掌中舒卷屈猶伸墨雲難染秋天闊碧玉還思曉
露新他日不須焚諫草一方何處覓緇磷

梅杖枝字

鐵石心腸冰玉姿掌中潛得歲寒枝天教一握藏春
密風覓餘香就手吹雪月冷懷隨步履溪山高興入
支頤玉堂若要扶持用說與東君也不知

竹癭知字

為憐鶴髮久雙垂秀出龍孫第一枝鑿破誰言混沌

死彈來未有歲寒知天材擁腫吾當取時樣裝嚴彼
亦宜風月不妨時角出清霜難旁老頭皮

醉梨寒字

玉簪香字 二首並見遺詩第四卷

秋蓮空字

瘦影亭上不自容淡香杳杳欲誰通不堪翠減紅銷
際更在清江月冷中擬欲青房全晚節豈知白露已
秋風盛衰老眼依然在莫放扁舟酒易空

西瓜

一片秋風落漢城人間無復渴塵生鑿開混沌星辰

出碾碎瑤瑤風露清胸次冰霜惟豕在口邊糖蜜向
誰傾爛腸莫道遮藏得黑子紅心到應明

又

一團天露暗藏春多少人間渴死人面上風標儘冰
雪胸中文彩爛星辰弄丸豕是希夷老鑿竅誰窺混
沌真沃上君心甘剖腹乾坤一闢要清新

貧士

貧士出門多掣肘聞君幾次謾徘徊不思學館三年
舊肯為山翁百里來久倚通家略賓主新知不飲罷
尊壘殷勤莫啟通宵話聽說天明即欲迴

故人見訪山中

客子畏人常簡出病來庭戶益荒蕪多時畧開通書
問遠踞遙慙送藥須掃地預占燈燼喜敲門遙認草
亭孤故人知永無供給故着看山慰野夫

次韻谷河間趙君玉見寄

出門紛擾互相尋常使幽人懶病浸前月借書來水
北去年採藥到城陰黃精已倩徐生斲蒼朮新教石
老尋只有烟霞肯賒借無人曾送買山金

憶郝伯常

一檄期分兩國憂長纓不到越王頭玉虹醉吸金陵

月玄鶴孤遊赤壁秋漠北蘇卿重回首天南王粲幾
登樓飛書寄與平南將早放艤舡下益州

涑陽李丈九十壽

九十餘年何限事向人惟指鬢毛霜偶因飲酒驚遲
醉不信看書託健忘還拜嗔扶緣敬客近游多步為
居鄉自慚犢子顛狂在世故艱難未備嘗

壽田處士

慷慨燕南烈丈夫半城和氣溢閭閻仕途盡看鼠為
虎若輩卻教龍作魚勤苦十年經子史風流千古畫
詩書交遊剩有名公在未許丹青作弊廬

何太夫人生日

夜々東鄰有香火高門因得百年心蟠栴結實世誰
見陰棟駭人根自浚經卷病餘猶早起絲車老去亦
親臨久知吾友閒居意惟願慈顏事不侵

偶得

血氣雖衰志愈真年來温故覺知新久貧多得鄉閭
歎漸老惟於道義親日月消磨三事樂乾坤俯仰一
間人絕時卜築唐溪上分得堯民五畝春

自覺筋骸老漸頑曾經堅脊度危闕清霜烈日留身
後秀氣春風拂坐間自有頽波如直柱莫教秋色避

南山雲鵬稅駕今無地羨煞江鷗盡日閒

次韻荅石林高

昨屈干旌到敝廬新時曾許鳳凰雛閑中無地宜三
徑天下何方是五湖抱昧長歌憶梁父曲肱高臥著
潛夫朝廷別有真儒在莫道斯文賴衣扶

次韻荅劉仲澤

世態年來一笑餘易川高興賦閑居靜中一點畫前
易身後數行言外書不食可憐周二子獨醒休笑楚
三閭囑君早了治安策枉對寒窓嚼子虛

自釋

嘗憂身口累心期溝洫高盟恐易違仲子不能分
躅栗伯夷終是食周薇胸中耿々獨如此天下滔々誰
汝黽洗耳沈江狂狷子也應猶笑永隨機

次韻叩泮宮

誤承儒冠一不成劔華搖落動江城心飛北闕知天
遠夢入南荒覺地傾磊落中原千古鹿淋瀝滄海一
杯鯨太平自有諸公在誰向南陽問孔明

哭申也

悲來思汝不可置揮淚問余何所悲青歆出藍今處
爾白能受采復誰期粥杯屢進知君薦藥累親嘗豈

我欺從此塵編只獨理不堪燈火夜涼時

哭王之才編脩

草上離觴記去年誰知此別是終天傳雖成癖今安
用史未為榮應自憐四座高談宛猶在一經白首竟
無傳交朋日與來書少不過西州亦泫然

千戶喬侯挽詩卷

拱木秋聲尚凜然平生鄉國愧幽燕千家聚落即山
砦四海牢籠勅勒天龍虎風雲空一夢闕河形勢記
當年重侯累將應須念創立艱難亦可怜

孫沁州哀挽

驚看哀誄為君傷一面十年不步忘秦府舊稱天下
選燕人元有北方強平生豪氣餘丘土寤寐裋交只
月梁聞說條陳有遺草承家洗眼看髯即

哭母族李凍陽

先人北還生於公家吾母卒因寓葬焉後
因返先人南遷十年之間公率家人拜掃
不廢其死也詩以識哀固自叙云

亂餘家破苦顛連生者安居死墓田瓜李自知象厚
施墻瑤終擬奠新阡餘仁尚墮千夫淚遺業惟存二
子賢一寸棘心思母切不堪重詠哭君篇

挽李漢卿

十載從君苦未遇直教窮死易堪哀交游有泪能知
已天地無心解愛才孤子猶尋朱硯泣奚奴不復錦
囊開南兄父客應相識為向譙東酌一杯

靜脩先生文集卷之六

靜脩先生文集卷之七
七十九字

靜脩先生文集卷之七

容城劉因夢吉甫著

五言絕句詩類

明珠穴

珠從何處來秀與天地生
涵蘊幾千古得此風露聲

滴水龕

膚寸徧天下至靜涵氤氲
因看石滴水窺見天生雲

石潭

清不見群魚暗不藏
毒恠觀物得吾師終日欲相對

春日

青竹集 卷之七 二百三十一
游絲困無力欲起重悠颺芳草落花滿相思春晝長

慎獨

一葉下秋水微波去不停望中猶隱々直欲到滄溟

毀譽

子賤波及魯犁牛不累驛寸心仁厚處萬物自生成

偶書

意當極快處心有不平時少忍容無害欲言當再思

夢中作

溪童望水滿日夜愁不已雖非鷗踏馬身亦有相關意

觀化

風雨何方來呼童出門望歸報是群蜂聲在庭花上

四皓圖

雖戀紫芝美難忘帝力沒驅馳恨臣老高尚豈初心

石鼎聯句圖

玩世如一鼎姓名誰得聞仙翁應自咲知我有鄒忻

白樂天琵琶行圖

冀馬嘶寒風逐臣念鄉國江浦聞哀絃長吟望南北

百蝶圖

芳蝶具百種幽巷散紅翠道人觀物心一一見春意

子期聽琴圖

琴瑟自吾事何求人賞音絕絃真俗論不是古人心

夢題村舍壁

村居有何樂所樂人真淳回看城市中居此勝買鄰

村居雜詩五首

鄰翁走相報隔窓呼我起數日不見山今朝翠如洗
黃昏雨氣濃喜色滿南畝誰知一夜風吹放門前柳
獨立偶懷古臨風還自傷一聲樵唱起回首暮山蒼
削樹題詩句畫沙知酒籌他年成故事蕭散更風流
芳茵皆可藉緩步即吾車乘興三杯酒隨行一策書

螳螂

逢物即能產其滋乃爾蕃不知何所積擬欲問乾坤

蝸牛

背上穿廬好問蟲誰汝施始知天地內棟宇匪人為

蝻

後利前還滿陰陽體改分不須觀兔尾即此見義文

蝻斯

陽施陰專受精醇物始真虫魚寧解此聊用比振匕

芍藥

宜致美人贈服之良有功分形雖異種氣類暗相通

牡丹

世變日以文花卉亦應尔懸知太古時其美未如此
萱草

丹鳳忽飛來喜色滿朝露何以稱此花白頭戲嬰孺
薔薇

色染女真黃露凝天水碧
蒼開日月長朝暮閱兩國
醪醪

勿翦架上蒼不是畏多刺得陰難忘枝曾向花陰醉
夜合

消忿緣無獨合昏如識時常絃千古意百繞惜芳枝
蜀葵

且勿論傾陽色香尤可喜人情輕所多共愛姚黃美
木槿

已拆暮欵落未榮朝又花生生如體道堪玩不堪嗟
看雪

雪花不擇地隨風恣飄蕩數片如有情飛落梅稍上
山亭獨坐二首

野情靜成癖幽居懶自高青山卧床下初不厭人豪
愛玩不能去山靜雲卷舒敲門者誰子聊復忍斯須

題山水扇二首

山近雨難暗樓高秋易寒憑誰暮雲表添我倚闌干

青竹文集 卷之七 四 二百五十九
二山環合一水中有老木參天不著幽人草閣誰收
無限雲烟

偶成

夢回聞雨聲忽覺是風葉問余何以知仰見梁間月

偶書二首

纍纍山下塚渺渺嶺頭雲歲晚不歸去笙鶴應望君
昨日宋人苗今日牛山木寄語芒屨人管取牛羊牧

明珠穴

山從何時裂珠去誰當還餘光爛猶在照我方寸間

盆池

有月漸秋影無風生小波澄心一相對今夜興如何

溪橋步月齋

山中有幽人獨步溪橋月莫問興如何披菴亦清絕

出花

下石綠珠井炙面昭君村坐令宜花地亦復愁移根

史處士挽章

平昔未相識幾回曾寄聲今朝聞謝世便有故人情

春露亭書

老樹含春容寒泉動幽響念彼山中人風露恣清賞

觀石佛有感

明月雲如洗白露春自生石邊有枯木風至亦知鳴

呂洞賓畫像

微茫洞庭曉瀟灑崑崙秋海蟾生碧天相從何處游

絕句

溪童出門望鷗鷺滿空下江水淡無清盡是忘機者

鴈圖

夢迴烟水寒鴻鴈驚不起道人心又閑相忘有如此

商方爵

商爵既云古那堪形更奇不宜燕市酒雅稱野夫詩

美盞

不作甕商舞休停餅氏歌執籌仍蔽簾辛苦歆如何

靜脩先生文集卷之七

青竹文集

卷之六

六



